

The Ohio State University



3 2435 05414798 8

THE OHIO STATE UNIVERSITY BOOK DEPOSITORY



D	AISLE	SECT	SHLF	SIDE	POS	ITEM	C
8	07	23	15	7	18	005	0

Dubel,

OHIO STATE
UNIVERSITY
LIBRARIES


۸۲۸

مرآت الیمن

مؤلفی

یمن حادیدہ سنجاغی مبعوثی


زھری



فیئاتی

غروش

(اٹمانی اتحاد و ترقی جمعیتی مکاتبی منفعتنہ مخصوص صدر)



استانبول

(قدر) مطبعہ سندہ طبع اولنمشدر

سنہ ۱۳۲۸ ہجریہ

کمال


J. A. LOWELL

مفاد المراد

دور حاضرک انوار شارقه سی هر بر فرد عثمانینک
قلبی ضیادار و بنم کبی بر عاجز نادانک بیله ظلمت
فکر یه سنه عکس انوار ایله خدمت وطنه هوسکار ایتمش
اولسندن مقتیبساً و اوتوز ایکی سنه دنبری بیلا فاصله یمنده
گذران ایدن اقامتمده متحصل معلوماته مستنداً یمن قطعه
جسیمه سنک احوال عمومی سی حقننده ایضاحات مفصله یی
جامع اولق اوزره « مرآت الیمن » نامی تجتنده یمنک
شرق و جنوب و شمال جهتنه داخل اولق طریقله تصادف
ایدیله جک هر بر قضا و شهر و محلاتک حال حاضرده کی
وضع و جسامتی و احوال جوغرافییه و تاریخیه و فصولیه
وزراعیه و معدنیه و صناعیه و تجاریه و نفوسیه و طباعیه
و سائر سی صره سیله ذکر و بیان ایتک صورتیه شو
مجموعه نك تحریرینه مجرد عون معین ایله شروع ایلدم
ومن الله التوفیق و هو نعم الرفیق

یمن حدیده مبعوثی

زهری



DS247

Y48Z83

1910

○ مرآت الیمن ○

جزیره العربک غرب وسطی و بحر احمرک شرق
جنوبیسنده اون ایکی درجه قرق دقیقه دن اوتوز اوچ
درجه قرق بش دقیقه عرض شمالی یه و اوتوز درجه
یکرمی دقیقه دن الی یدی درجه قرق دقیقه طول شرقی یه
قدر ممتد و تخمیناً ایکی میلیون سکنز یوز بیک کیلو مترو
تربیعنده مساحت سطحیة ارضیه یه بالغ و مع عسیر تخمیناً
ایکی میلیون نفوسی جامع و یمن نامیله معروف بولنمان
قطعة جسمه نك جنوباً مبدئی اولان و قطعه یمانیه منسوب
بولنمان عدندن شمالاً عسیره قدر ویریله جک معلومات
جماه سندن ابتدا عدن شهری حقننده استحصال ایتدیکم
معلوماتی بروجه زیر عرض ایدرم .

○ عدن ○

عدن کورفزینک منتهای شرقیسنده واقع عدن
بلده سی دائراً مدار دکز ایله محاط و یالکز جهت
جنوبیه سندن قره یه برقالدیرم واسطه سیله مربوط و عدنه
منتهی اولان بو یولک اوستنده کی طاغک قاعده سندن

جبل حدید تسمیه اولنان تونلدن عربیه ایله اوج دقیقه ده
کچیله رک دخول اولنور بر شبه جزیره در . قدیم بلده
درت طرفی مرتفع طاغیرله مسدود و هر طاغ ایله دیگرینک
آرسنده طبیعتاً موجود اولان فاصله لر دخی طاشدن انشا
ایدلمش دیوار لرله قیاش بر او و ونک وسطنده مربع وضعیتده
و بر رقات طاش ابنیه و اما کنی حاویدر .

✻ تواهی و معلا و شیخ عثمان محله لری ✻

و اپور و سفائن سائر ونک طور مسنه مخصوص اولان
ویالکنز شمال جهتندن مدخلی بولنان لیمانی مستطیل
بر صورتده جنوبه طوغری ممتد و غرباً عدن طاغیر یله
و شرقاً ساحل بر ایله مخاطره دن محفوظ و جبال متواصله ونک
اتکلرینی تشکیل ایدن ساحل شرقی شمالیده واقع
طولانی وضعیتده تواهی نام محله ایله عدن آرسنده
و ساحلک شرق جنوبیسنده لب دریا ده کائن ویلکن سفائن
صغیره سنک اسکله سی متخذ معلا نام دیگر محله اولوب
هر برینک ارسه عربیه ایله اون بشر دقیقه در . معلانک
غرباً آرقه سنده واقع غایت مرتفع و عدن ایچون علامت
فارقه تشکیل ایدن شمسان نام طاغ براق هواده آلتمش
میل بعد و مسافه دن کورینور . عدنه نک کچید واسطه سیله
متصل اولدینی بر اصلی ساحلنده شیخ عثمان نامیله بیوجک

بر محلہ دخی وارد در . درت محملہ متفرق اولان عدن
شهرينك درت قسمتك نفوسى ذكور وانات قرق بيك
كشى به بالغ اولور . سکنه نك اکثریسی یعنی قطعہ سندن
وايكنجی درجده شجر ومكلا وافر يقاده واقع صومالى
قطعہ سندن هجرت ايتمش اولانلردن ومسلم وغير مسلم
هندستان اهالی سندن واوروپالیلردن متشکلدر . عناصر
مختلفه دن اجتماع ایدن اهالی مسلمہ بر بردن تأهل ایدہ -
کلدکارندن طولانی جنس اصلیلرینی غائب ایدرک عدنه
نسبتاً عدنی بر نسل دخی وجوده کلمشدر . عدنده کی
انکلیزر اولیای امور وامرا وعسکری صنفندن وهندلی
مسلم وغير مسلم سکنه سی تجار صنفندن وصومالی وعربلر
صنایع ساثره وملاح وجمال وعربه جی وخدمتجی قسمندندر .

﴿ تاريخچه سى ﴾

انکلیزرک هندستان مستملکه سنک طریقى اوزرنده
واقع اولان عدن قديماً معروف بر محل ایسه ده غیر
مسکون ایکن بوندن بر عصر اول اوراسنی کمور دیوسی
اتخاذ ایلک اوزره باب عالی جانبندن استحصال ایلدکاری
مساعده اوزرینه انکلیزر طرفندن اعمار ایدیلهرک حال
حاضرینه واصل اولمشدر .

﴿ اشكال و طباع و امزجه ﴾

بياض و بغدادی و اسمر و سیاه و قوزغونی سیاه و نسکلر ده
وهر صنف و جنسك كندینه مخصوص کسوه لرده بولنان
عدن سکنه سنك قیافتی مختلف و متنوع اوله رق عادتاً
انسان قولکسیونی مثالده کورینور . سکنه دن ینلیلر ایله
عدنیلر حدیده فصلانده ذکر ایدیله جك اولان و نباتاتك
غیر مثمر خضورات شجریه فصیله سندن بولنان قات نام
مکیفی استعمال ایدر لر . اجناس مختلفه بر بر یله انسیت
ایتمیوب هر جنس کندی جنسندن حظ ایدر . بوسیلله
موقه بولنه جق یبانجی زیاده سیله صیقیلور .

﴿ عدنك احوال جغرافیة سی ﴾

عدن و جوارینه آنجق یدی سکز سنه ده بر دفعه
یاغمور یاغدیغندن زراعتدن و فصول اریعه دن محرومدر .
و خط استوایه قریتی بولندیغندن شتا موسمنده بیله
صیجاقدن و حرارت شمسدن مضطرب اولماق قابل
دکلدر . موسم صیفده ایسه قورو و غایت صیجاق اسن
باد سموم درجه حرارتی کولکده قرق بش سانتیغراده
ایصال ایدر . و قبل الشروق و وقت الغروب اولدجقه
مساکندن چیقماق و بالخصوص کونشده کز مک تهلیکدن

معدوددر . اوراده برشی یتشمدیکندن صناعت یوقدر .
آنجق عمله ورنجبر ایچون واپورلره کمور ویرمک و مال
چیقارمق خدمتی دائمیدر . بوندن باشقه نفس عدن
وتواهی و معلاده صوا اولمدیغندن ایچه جک صودن طولانی
اولان احتیاج عمومینک دفعی ایچون معلاده ایکی عدد
صو و بوز ما کنهسی وارددر . بونلر سایه سنده حرارت
هائلهیه معروض اولان بوبلده اهالیسیله واپورلره لزومی
اولان صو و بوز بولنه بیللمکدهدر . فقط شیخ عثمان نام
محلده قیودن چکیلان طوزلیجه بر صو ایله یتشدیریلان
برایکی باغچه دن بشقه عدنده براغاجه تصادف اولنمز .

﴿ تجارت ﴾

عدن بحر احمرک منتهای جنویسنک خارچنده واقع
اولغله اوسترالیا و هندستان و چین و اقصای شرقه کیدوب
کلان واپورلرک کمور المق جهتندن اکبرنجی استناد کاهیدر .
و بحر احمرک شرقنده کی یمن و حجاز و غربنده کی افریقا
قطعه لرینه کیده جک حبوبات و ذخائر و بهارات و منسوجات
و اعز و ملاحقاتنه برآ دوه لرله کیدن هر نوع اموال تجاریه
ویمندن چیقان محصولاتک بیوک بازاریدر . عدن جزیره سنک
شرقنده واقع و ذکر می مسبق لیمانک حاوی اولدینی
بحیره نک شرقنده کی ساحلده فنا یتشدیریلان کول طوزینک

ساحل بونجه آچیلان متعدد تابه لره ماکنه واسطه سیاه
دکزدن ویریلان صولر موسم شتاده اون بش صیفده
سکنر کونده بلا انجماد حاصل اولان طوزلر یغنلرده
ادخار ایدیلهرک هندستانده واقع قالکوته شهرینه سنوی
الی بیک طونیلاتو سوق اولنقددر .

{ عدندن شمالاً و بحرأ حدیده طریقی }
{ « پریم اطهسی » نام قدیم دیگر میون }

عدندن شماله طوغری بحرأ یتش میل مسافه دن
صکره باب المنذب دنیلان یمنک شیخ سعید ساحلی ایله
آفریقا قطره سنک مدخلنده واقع اوله رق پوز سنه دنبرو
انکلیرلرک تحت اشغالنده بولنان پریم اطهسی افریقا ساحلنه
اون و شیخ سعید ساحلنه اوچ میل مسافه سی و تقریباً
اون ایکی کیلو مترو تربیعنده مساحه سی اولوب قمر
دریادن مرتفع طاغلرک سطحنده متشکل طاشلقدن
عبارتدر .

اوراسی دخی کمور دیوسی اتخاذ اولندیغندن کلیتی
معدن کمورینی حاوی اولغله کمور شرکتنک اجته لرله
عمله لبرک اقامت محلی در . جنوباً واقع غایت محفوظ اوفق
بر لیمانی وارددر . اوراده دخی برصو ماکه سی وطاشدن
تختانی اوطه لردن عبارت اینیه سی موجوددر . شرقدن

اوروپایہ مربوط تلغراف قابوسی بواطہ دن کچرہ واسی عدن
کبی غایت صیجاقلدر .

﴿ شیخ سعید ﴾

پریم اطہسنک شرقندہ دکیزہ طوغری ممتد اولان
برونک ساحلی اوزرنندہ کائن وسطح دریادن ایکی یوزاللی
مترو قدر مرتفع طاغک اوستندہ حکومت سنیہ جانبندن
انشا ایدیلان محکم طابیه پریم ایله شیخ سعید آرسندہ کی
دکیزہ حاکمدر . فورطنہ یہ تصادف ایدن قایقلر اورادہ
لیمان حالی تشکیل ایدن مفاق وشیخ مالو اطہجقلرینہ
گیرہرک بارینور .

﴿ مخا ﴾

باب المنبدن شمالہ طوغری التمش میل مسافدہ اون
اوج درجہ یکرمی دقیقه عرض شمالیدہ وساحل اوزرنندہ
کائن مخا بلدہ قدیمہ سی ساحل استقامتنجہ امتداد ایدن
وارہلری تقریباً بریچق میل آچیق اولان ایکی عدد خط
برونک وسطندہ مربع شکلندہ در . برونلرک تشکیل
ایلدیکی نصف دائرہ دن طولانی لیمان حالنہ کلان بومحکم
مرور زمان ایله ایچریسی قوم ایله طولمش اولدیغندن
انجق اوفق قایقلر اورایہ کیروب بارینہ بیلور ایسہدہ

واپور و بیوجک سفائنك دخولنه مانعدر . مذکور
 برونلرک دکره منتهی اولان اوجلرینک اوزرنده قدیمآ
 خراب اولمش برر قلعهنک اثارى وارددر . دکر جهتندن
 کورینسان و جنوبه طوغری بر چوق خرما اناجلرینی
 حاوی عظیم برمنظره تشکیل ایدن بیاض و مرتفع ابنیهسی
 عصرنده اوج اعلايه واصل اولان معموریتنی ارائه ایدر .
 بلدهیه کیرلدیکی حالدده وقتيله قلمه دیواريله محاط و خانهلری
 اکثریتله بیوجک و اوج درت قاتلی خرجلی طوغله دن
 انشا ایدلمش ابنیهنک خرابهلری کورینور . وقتيله مبانینک
 قیو و خجره و سائرهسی هندستانک ال معتبر کراستهسی اولان
 ساج نام تختهدن یاپیش و انواع اشجار و نباتاتک تضاویرینی
 حاوی قبارتمه بر صورتده ایشلمشدر . بحر احمرک شرق
 و غرب سو احلندهکی مملکتلرک قدیمآ ال معمور و مشهوری
 اولان خانک اثار معماریه و صناعیهده دخی حاز رحجان
 اولدینی آ کلاشیلماقدهدر . ازمئه سابقده مخایمنک یکانه
 مخرج اسکلهسی اولسندن درکه اوروپاده زمانمزده بیله
 « قافه موقا » ناميله یمن قهوهسی معروف اولمشدر .

﴿ تاریخجهسی ﴾

مخا بلدهسی تقریباً ایکی بیك سنه اولیسندنبرو معروف
 اولمش و قرون ماضیهده جزیره العربک ال برنجی ادخالات

واخر اجاتنه مخصوص شهری اوفاق بر اسکله ایدی .
عصر مزه کلنجه یه قدر یعنی سگسان طقسان سنه اول درت
بش بیک خانه بی وبرچوق خان و دپوی و مبانیء جسمه بی
ویکرمی بش بیک نفوس مقدارنده سگنه بی شامل ینه
معمور و آبادان ایکن دولت ابد مدت علیه عثمانیه نیک
خطه یمانیه بی بر مدت اداره دن دست کش استغنا اولدیغی
صره ده شریف طامی و علی نام ذواتک اداره سنده قالدیغی
زمان عسیر قطعه سی امیری عایض طرفندن خطه یمانیه
تجهیز ایدیلان التمش بیک کشیک براردو ایله شهر تشعار
عالم اولان مخایه کلش واحراز غالبیتله عادات قدیمه
طوائف اوزره مملکته دخول و قتل نفوس وقوع
بولمزدن اول اهالیسنک اکثرینی عدنه هجرت ایتمش
ایدی . بو صورتله دفعه مخادن هجرت ایدن اهالی
آرتق تکرار مخایه عودت ایتیوب عدنده توطن ایتمش
وعدنک از مدت ظرفنده معموریتنه مساعده بخش ایلشدر .
بوندن التمش بش سنه اول دخی عدنک سربست لیمان
اعلان اولنمسی اوزرینه مواردات تجاریه عدنه انتقال
ایدرك تجارت نقطه نظرندن مخانک اعتبار سابقی دخی
زائل اولمشدر . الیوم مخاده درون شهرده مسکون
اوله رق اون بش . قدر کارگیر خانه دن و خر مالغه

طوغری متفرق برحالده اوت واناج وحصیردن انشا
ایدلمش عریش تسمیه اولنور . اوچیوز قدر اوفق
مساکندن و بیک ایکی یوز قدر نفوسدن عبارت قالهرق
مملکتک شرق طرفنده کی باب الشاذلی نام قیوده انسانه
تصادف اولنه بیله جک درجه ده درونی تنهالشمشدر .
معروف اولان حکم و مشالحه وزهارین قباہ لر یله برابر
عموم قضانک نفوسی بش بیک راده سننده در . التمش میلدن
کورینور برفناری واردر .

﴿ زراعت تجارت صناعت و معادن ﴾

مخانک اطرافنده کی اراضی طاتلی صوینی حاوی
اولیهرق قوراق بر صحرا دن عبارتدر . و ایچیلان صودخی
خرمالقار آره سننده دکز قربنده کی قیولردن چکیلور
ایسه ده طوزلیجه در . بو صوینی ایچه میانلر شمال جهتنه
طوغری یکر می بش میل مسافه ده کائن موشیح
قریه سنندن جلب ایدر لر . ینک تکمیل تهامه قطعہ سی
بلاد حاره دن اولدینی جهتله مخا بلده سیده حرارتی حائر در .
بار کیر ایله اون ایکی ساعتک مسافه بریه شرقیه نک نہایتی
اولان طاغله قدر مخانک صحراسی یا غمور وقوعنده منبت
بر حاله کاور و موسمنده دوره پاموق خرما حاصل اولور .
قرب و الان قضا و نوا حیلردن مخایه دوه ایله کلان دوره

دخن سیسام پاموق وقهوه و حیوانات اهلیه دریمی کبی
بعض منقولات تجاریه قایقارله عدنه وبر جزئی ده
قارشوده واقع افریقانک عصب بلده سنه کیدر . مخا
جوارینه لازم اولان امتعه تجاریه دن بهارات متوعه
وپرنج ومنسوجات قطنیه وحضرموت قطعه سندن کلان
حمومی و هندستانک سورتی تنباکولری عدندن وبر
مقداری عصب دن قایقارله ادخال اولنور اخراجات
وادخالاتک قیمتی سنوی یکر می بیک لیرا نسبتنده اوله .
بیلور . طائفه نسا ایله بعض ارکیکارک دوم اغاجی یپرا .
قلرندن اوردکاری حصیر وظروف ویلیازمه محفوظه شکلنده
جونیه وقوقه و سپور که لردن بشقه بر صناعت یوقدر .
مخانک زهارین ومشالحه قبیله سی افرادندن عبارت اولان
یرلیسنک مدار معیشتی اشیای تجاریه بی اطرافه نقل ایتمک
و ذکر ی کله جک اولان مملحه لردن الدقلری طوزی ایچرو
طرفلره کوتوروب صاتمق مشغولیتنه منحصر دوه جیلکدن
عبارتدر . مد زماننده دخول ایدن دکر سویندن طولان
تابه لرده حصوله کلان کول طوزندن بشقه بر معدن یوقدر .
طوز ویرن مملحه لر اوچ عدد اولوب حکم ومشالحه ویختل
ناملریله مسما در . حکم مملحه سی مخانک ساحل جنوبیسنده
ودرت ساعت مسافده ویختل مملحه سی ده مخانک جهت

شمالی سیندھ التي ساعتك مسافده و مشالحه مملحه سی ده نفس
مخالك ساحل شمالی سینده واقعدره بو مملحه لرك اك جسیمی
یختل مملحه سیدره ممالح مذکور منك اخراجات سنویه لری
بر بچق ملیون کیلو درجه سینده اولوب اك چوغی داخلاً
رماده چارشوسنه و مقبنه و تعز و زبید و حیس و وصا بین
طرفلرینه دوه لرله و خارجاً دخی بحراً عصب و اوبوخ
وزیلع و زنجبار جهتلرینه قایقلرله سوق اولنور مخا بلده-
سنگ جنوبینده کی خرما غا جالرینك اسقاسی ایچون جز عنده
آچیلان چقور لرده قلان صودن وبالخاصه شرقندن شماله
متد اولان طوز تابه لرنده متراکم میاهك تعفنندن اولمق
کر کدرکه هواسی و خیم اولوب شتا موسمنده کثیر و شدید
اولمق اوزره ستمه خسته لغی بتون سنه مرض دائمیدره.

﴿ مخادن حدیده یه قدر سواحل ﴾

مخادن اوتوز میل و حدیده یه یتمش میل مسافده
جبل زوقر نامنده بیوک بر طاغی حاوی براطه واردره.
اوراده برفنار ایله قره غولخانه موجوددر مخادن حدیده یه
قدر بحراً یوز میل مسافه اولوب مخادن ساحلاً کلینور
ایکن یختل و موشیح و خو خه و متینه و فازه و مجلیس و جاح
و غلیفقه و قرین و رأس المیجامه و طائف و رمان و قضیه و منظر
نام کویلر ساحل بو یخه بر برینی تعقیب ایدره بو کویلردن

موشج و خوضه و متینه و فازه و قرین سکنهسی بالقجیلقله
 تعیش ایدر . چیقاردقلری صیدماهی طوزلانوب
 قورودلدقدن صکره قسم اعظمی دوه لرله داخله کیدر .
 و بر قسمی جاوه و سیلان و فلفلاتق اطهرینه کیتمک اوزره
 عدنه اخراج اولنور . مجیس و جام نفوسجه زیاده
 اولوب بیوجک قریه لری و بالخصوص طولاً و عرضاً
 نهایتی کورنمز برر ساعتک مسافه امتداد ایدر . غایت
 کثیر خرما اغاجلری حاویدر . تازه خرمانک زمان
 ادراکنده زبید و بیت الفقیه و جوارلرندن پک چوق
 اهالی کلوب تازه خرمانک ختامی زمانه قدر برچق
 ایکی ماه اقامت ایدرک اوراسنی شنلندیررلر . غلیفقه
 کوی اوفق بر لیمانی تشکیل ایدن کورفزک شرقنده
 و ساحله یارم ساعت بعدنده چوچه خورما اغاجلرینی
 حاویدر . اوفق بر کورفز داخلنده بولنان غلیفقه نک
 ساحل طرفندن بیوک بر مملحهسی واردر . بو مملحه
 ساحل استقامتنجه شمال و جنوبه طوغری ممتد و هر بری
 بش التي مترو وسعتنده طوز تابه لرندن متشکلدر . بو
 تابه لرندن چیقان طوزک مقدار سنویسی اوچیوز بیک
 کیلو اولق اوزره بیت الفقیه و ربمه قضا و نواخیلرینه
 دوه لرله کیدر . رمان ایسه ساحلک شرقنده در بش کویندن

متشکل و بر چوق خرما اغاچلرینی حاوبدر . اغاچلرک
اٹماره باشلادیغی زمان یعنی حزیران و تموز ماهلرنده
قریبتی جهتله حدیده دن وجواری اولان دریه می قریه سندن
کلان اهالی ایله اوکولر خنججا خنج طولار و بیوجک
بر چارشو قوریلور عریش خانه لرده دکانجی و سرکیجی
وکزکنجی هر نوع اصناف اجرای صنعت ایدرلر . تازه
خرما غایت صیجاق و توز و طوپراقله قاریشیق اسن صام
روزکارینک زمانی اولان اوچ ماهه قدر امتداد ایدر
ایسه ده اصل زمانی قرق کوندر بو مدت ظرفنده وقت
و حالی مساعد اولانلر هیچ برایش ایله اشتغال اتمیرهک
یالکز استراحت و تبدیل آب و هوا ایله کیجه لی کوندزولی
قات دنیلان مکینی بکده حصر اوقات ایدرلر ایام مسعوده دن
عد ایتدکاری شو زمانک ختامنده هرکس یرو پرینه
چکیلور و خرماقلر تنهالشور خرما اغاچلری ساحل
وساحله قریب اوله رق طوزلیجه بر صوی حیوی اولان
اراضیده یتشدیکی جهتله جبالده بولنمز بعضاً طاغ اتکلرنده
چیقارایسه ده محصول ویرمز خرما اغاچلرینک بواندیغی
محلرک حرارت زائده سیله برابر حزیران و تموز ماهلرنده
اسن باد سموم کونشده آتش قدر تأثیری واردر و او
سببله شروق و غروب زمانندن بشقه بروقتده مسا کندن

چيقيمق قابل دكلدر . خرما القلرده بولنه جق كيمسه لرك
ايچدكاري صوخرما اغاچلرينك اره لرنده اولان طوز ليجه
قيو صوييدر . خرمانك بدايت طلعدن نهايت اداننده كين
قبوغنك الواني وشكل ادراكي تبدل ايتدكجه بشقه بشقه
اسملرله تعريف اولنور و خرمانك اجناس مختلفه سي
جهتيله هر نوع بر اسمي وارد رمان كويندن صكره
قضبته قريه سي كلور ساحلدن يارم ساعت قدر شرقده
يكرمي بش اوتوز عريش خانه لي و آز خرما اغاچلريني
وطوز ليجه قيو صويني حاويدر سگنه سنك صنعتي دوه .
جيدكدن عبارت اوله رق ياغمورك كثرته نزوليله فيضان
ايدن وادي سهام نام سيلك قضبه اراضيسي اروا ايلديكي
بعض سئنه لرده براز داري ودخن و سبزه وقارپوز
ذرعيله ده اشتغال ايدرلر ساحل بويجه ايجه طوز تابه لريني
حاوي قضبه ناميله بر مملحه موجوددر . بومملحه نك نيساندن
اعتباراً وقت صيفده مد زمانلرنده التنده نبعان ايدن
دكز صويندن طولان تابه لري هر اون بش يكرمي كونده
بر طوز و يرر شتاموسمنده هبوب ايدن جنوب روزكارينك
شدتيله حاصل اولان مدكلي زماننده ساحل بويي دكز
صوييله طولار و طوز تابه لرينك اطرافنده كي طوپراق
سدلر اطه حاينده كورينور بومملحه نك اخراجات سنويه سي

اوچيوز بيك كيلو نسبتده اوله بيلور ايسهده پك چوق
طوز ويره جك متعدد حوضار كشادينه اراضيسنك
استعدادى واردر . قضبه نك عرباً قارشيسنده طورقه
اسميه بر اطه واردر . بو اطهده منحط يرلرده متر اكم
صودن يالكلر موسم صيفده طوز حاصل اولور و كلوب
چن بالقجيلر اورادن طوز آلور ايسهده سنوي يكرمى
بيك كيلودن متجاوز دكلدر قضبه دن صكره اللى التمش
عريش خانلى و طوغله دن ياپش مازغالى بر بورجى
حاوى منظر قريهسى كلور بو قريه نك تكميل سكه نيهسى
حديده قسمنده تفصيلاتى كله جك اولان حوك نام بز
طوقه جيلرندن عبارتدر و بشقه بر صنعتلرى يوقدر منظر
قريهسى لب درياده كائن مرتفع قوم تابه لرى اوزرنده در
طاتلى صويى حاوى ايكي اوچ مترو عمقنده قيولرى
واردر متتابعاً ياغمور كلديكى سنه لرده صويى طاتلى
اولور سنده قوراقلق زماننده طعمى بوزولور قضبه دن
منظر قريه سنده قدر اولان ساحل تكميلاً اراضى
رسوبيه دن متشكل اولدني جهته يونى تماميه بيلميانلر
ويرايسندن رهبر المفسرين كيدنار بطاقلقره دوشمه لرى
اقرب مخاطرهدر .

○ حديدہ ○

اون درت درجه قرق یدی دقیقه عرض شمالیده
 ودکنز تسویه سنده محنت اولان ساحله واقع ودکنز
 جهتندن مرتفع ابنیهلی کورینان حديدہ شهری زمانمزده
 يمن ولايتك اك برنجی تجارتکاه و مورد بر اسکله سیدر
 تشرین اولدن بدأ ایله نیشان اواسطنه قدر بحر احمرک
 باب المنذب بوغازندن جبل طیر اطهرینه قدر شدتله اسن
 و بورالرده اذیب تسمیه ابدیلان جنوب روزکارینه معروض
 وسفائتک بارینه میه جنی آچیق برلیمانی واردر بوروزکارک
 مصتادف اولدیغی شهر قریه ابتدالرنده دوشر ایسه ده
 سکنز طقوزندن صکره اون طقوزنجی کوننه قدر هر
 کون بر درجه تزايد ایدر اون طقوزنده تکرار دوشهرک
 یکر می بشنده یزه تشده باشلار زمان شدتنده بیوک بیوک
 طالغله رقالدیرر بوسره ده بولنه جق کیلر مال الوب ویره منزلر
 وانجق کیجه بر ایکی ساعت ارهلق ویردیکنده ایشلیه
 بیلورلر بیوجک سفائن ساحلین بش التي میل اوزاق
 بر نقطه ده تیمورلدکاری کبی اوفق واپورلر بیه اوج
 میللک بر موقعدن زیاده تقرب ایده منزلر مذکور روزکارک
 شدت کسب ایلدیکی ایامده یعنی قمرک استقبال واجتماعی

زمانه نرنده سواحل یمانیه ده درت قدمدن متجاوز مد کلی
وقوعبولور و محنت سواحلده صولر ساعتده بر بچقدن
ایکی میله قدر بر سرعتله جریان ایدر حدیده شهری
طوغله دن ایکی اوچ قات ارتفاعده ابنیه لی وجنوب
وشرق و شمال جهتدن خراب اولمش قدیم قلعه دیواری
ایله محاط وخارجنده شمالاً و شرقاً وجنوباً اوچ کیلو
مترولق مسافیه قدر مربع وضعیتده در داخل و خارجاً
کار قدیم اوزره یاپلمش و سواقلری طاراشدیرلمش ایکی
بیک بشیوز قدر کارگیر خانه و بش التی یوزدکان و دردی
بیوک و بیکر میدن متجاوز کوچک جوامع و عریش تسمیه
اولسان اوت و حصیردن التی یدی بیک خانیه یی و تخمیناً
قرق بش بیک نفوس اسلامیه یی حاویدر سورک شرقنده
واقع باب المشرق میدانندن بشقه واسع و طوغری جاده سی
یوقدر و ابنیه سنک تقسیمات داخلیه سی غیر منتظمدر
حدیده سکنه سنک همان عمومی کرک شرب و کرک سائر
ایچون اسنعمال ایلدکلری صو اوچ چاریک بعدنده
مدینه نك شرق شمایسنده واقع قبولردن دوه ایله چکیلور
عر به لرله و مرکب لرله بلده یه نقل اولسان طوزلیجه بر
صودر منظر قریه سندن دوه لرله کتیریلان طاتلی صو ایله
قضیه نك شرقنده کی او ده بوندن اون بش سنه اولارباب

خیردن و حدیده تجارندن متوفی حسن ساحان طرفندن
 یاپدیریلان و دوه ایله اوچ ساعتک مسافه سی اوله رق
 محاصیم نامیه معروف اولان قیودن دخی طاتلی صو
 کلور ایسه ده نفس حدیده تک مذکور طوزلو صوی
 شربنده دهاخفیف و منظر و محاصیم صوی کبی شیشکینلک
 ویرمز شهرک شمال شرقی سنده بر قاج خرما اغاچندن
 بشقه بر یشلک کورنمز و اوچر ساعتک مسافه یه قدر
 اطرافنده زراعت بولنمز سبزه و فوا که و سائره اطرافنده کی
 جبال و نواحیدن کلور اک زیاده صغوق اولدینی سنه لرده
 تشرین ثانی و کانون اول و ثانی ماهرنده میزان الحراره
 قبل الشروق یکر می درجه دن اشانی دوشمز و بعد الشروق
 یکر می بش درجه یه قدر چیقار و شباط ماهنده انسان
 آرتق تر لکه باشلار اینجه و خفیف قاشدن بشقه بر البسه یی
 وجود تحمل ایتمز مایس ابتدا سندن ایلول نهایتنه قدر
 درجه حرارت کولکده دایما اوتوز التي سانتغراد ی
 اشعار ایدر . اوستی آچیق حمام دنیلدیکی قدر تردن
 و ثقلت هوادن نفس النمز هواسنک رطوبتی حسبیه
 صیقندی ویرر صیجاق زمانلرنده وجودی سیویله جهلر
 استیلا ایدر یبانیجیلارده چیقان چیبانلریده اضطراب ویرر
 بوندن بشقه حرارت اراضیه مرض برانمز حدیده اطرافی

اولان صحرائك مزروعات و فصول و سائره سی تهامه
 قطعه سنك افاده ایدیله جك اولان احوال عمومیه سنه تابع
 اولدیغندن انجق نفس حدیده یه سنه ده برایکی دفعه یاغفور
 یاغار بعض سنه لرده هییج یاغمز یاغفور یاغدیغنده هوایی
 اخلال ایدر و ستمه و زکام و نوازل امراضی باش کوسترر
 یاز و قیش بامیه و مهلیه سمیز اوئی لیمون طوب و قباق
 و قیش زماننده دوماتس سیاه پاطلیجان کلور هضمی بطی
 اولان موز دائماً و حرارتی تزید ایدن آمیه و تازه خرما
 یکله میه جکی بر موسمه یعنی یاز زماننده ایکی ماه قدر
 بولنور یاغفور زمانلرنده قاربوز و قاوون و اغستوس ده
 صنعادن اوزوم کلور ولایتک برنجی اسکله سی اولاق
 و مورد و مخرج بولنق سببیه تهامه و جبالدیه حصوله کلان
 حبوبات متنوعه و محصولات سائره و امتعه اجنبیه نك
 کافه سی بولنور. حدیده سکنه سی اولجه زبید و بیت الفقیه
 و باجل زیدیه طرفلرندن و جبال اهالیسندن و بوندن اوچ
 عصر اول کلان هندلیلردن عبارتدر اکثریسی شافعی
 و بقیه سی حنفی مذهبنده در حبش جاریه لره میل و محبتلری
 اولدیغندن وقت و حالی مساعد اولانلر جاریه آلورلر
 و بوسببیه حبش عنصری ده قالمشدر. یرلیلردن تأهل
 ایدنلر اکثریتله فقرا طاقنندن اولدقلری جهنله تزوج

ایده جک کیمسه ایچون « مخدره » نامیله بیوک بر محل
یاپه رق اطرافنی حصر ایله قیادیرلر و سمره دیدکلری کیجه
مسامره سنه راست کلانلری دعوت ایدرلر مدعولرک هر
بری حالنه کوره معاونت تقدیه اعطاسی ضمننده بو محله
کلهرک صباحه قدر قات یرلر و غزل و شرقی اوقورلر
کلنی کیجه دوه اوزرینه بندیره رک و محله می نساندن
برچوقلری دوه ارقه سندن ال چیرپه رق کویک خانه سنه
کتوررلر .

﴿ لسان واهزجه ﴾

حدیده ده لسان عمومی عربجه در فقط الفاظ عربیه
اصلیه آاز تصادف ایدیور و عربستانک دیگر قطعهرینک
و حتی اک زیاده قریت و مناسبتی اولان جبال اهالیسی
ایله عسیرلیر. حدیده لیلرک مکالمه سندن مقصدی
کافتله اکلایه بیاورلر هله عراق و شام و مصر قطعهرلی
سکنه سنه بتون بتون بشقه بر لسان کی کلور اهالی یبا.
نجیلرله اختلاط ایتمزلر و بشقه بر لسان بیامزلر حتی بونجه
سنه دنبرو تحت اداره سنده بولندقلری دولت علیه نک لسان
رسمی اولان ترکیه پی بیلان آزددر « البر و السمن و العسل »
دیدکلری واک برنجی یمکلری اولان بال و سواده یاغنه

باطرلمش حنطه خمیرنی ییهرک وقات دنیلان مکینی الهرق
مبرزه کیدوب اقشامه قدر قات یرلر .

﴿ قات نام نبات ﴾

قات دنیلان شی وقتیه افریقانک حبش قطعه سندن
جلب ایدیلان فدانلردن یتشدیرلمش وتهامه قطعه سنده
چیقمیهرق یالکز قهوه یتشدیکی جبالده حصوله کلکده
و یوقاروده بیان ایدلیدیکی وجهله خضورات شجریه
فصیله سندن میوه سز بر نباتدر دفته یاپراغنه بکزر یاپراقلری
واردر برر قاریش برقیاسده کسیلان طاللرک سکز اون
عددی بردمت یاپیهرق صاتیلور و بودمتلره ناصف دنیلور
مبذول اولدیغی زمان اوچ درت غروشه صاتیلان دمت
بیراملرده وکلدیکی زمانده سکز اون غروشه چیقار
کلدیکی کونلرده مبتلاسی اولانلر فوق العاده مایوس و مکدر
اولورلر و هیچ برایش کورمکه نشئه لری قالمز کسب
و تجار تارینک یوزده یتمش بشی قاته ویرمک ایچون
بلا تردد سخاوت کوستررلر اغنیا واصناف قسمی ساعت
بشدن عوام طاقمی اوپله طعامنی یدکدنصکره وقت غروبه
قدر قات یمکه حصر زمان ایدرلر قات یمک ایچون کارگیر
خانه لرک آلات قاتلرینه و سوز خارچنده اکثریتله اوت

و حصیردن یاپیش سقفی منشورالشکل وقاعدہسی صرابع
اولان اجتماعکاهلره « مبرز » نامی ویریلور بو مبرزلرک
صاحبی وقت وحالنه کوره بر مترو ارتفاعنده کورسیلرله
دائراً مدار تهیه ایدلمش و اغنیا مبرزلرنده اوزرلرینه
کلیم سریش و بریسی ارقه لرینه وایکیسی قولتوق آلتلرینه
قولتوق اوزره اوچر یاصدقن وتحتہ ماصه لر اوزرنده
ایجابی قدر نارکیله لردن طونادلمش محالدر قات یینلر
قاتلری قولتوقلرینک التنده اولدیغی حالده کمال نشئه
و افتخار ایله برر ایکشر کلوب طوپلانورلر و کورسیلر
اوزرنده صول طرف اوستنه یان کلورلر واصلاتبدیل
وضعیت ایتیه رک غزل ومدحیه لرله نغمه پرداز اولمغله وقت
کچورلر قات دخی صول یناغی چکدن ایکی سانتیمتره
قطرنده شیشره جک قدر طولدیروب آره صره اوستنه
صو ایچرلر ومتصلاً چیکنرلر وکیجه نی ساعت التی پدی به
قدر بو حال ایله کچیرلر قاتک وجوده ویردیگی تاثیرات
وحسیاتی اکلایق ایچون دفعاتله یدم اغزی بوروشدیریحی
واجیمسی برضوی حاویدر ینلدیگی وقت یرندن قلدانمغه
مجال قالمیه جق قدر وجوده او یوشق قلیق کتیرر قاتک
حرارتی کسه رک صوغوقلق ویرر اولدیغندن هوا
کیرمامک ایچون مبرزلرک منفذلرینی قیامغه وقات ییانلرک

تحمّل ایلدئمیه جکی بر درجه حرارتہ کک تیرمکه مجبور
اولدقلربی اکلادم قاتک وجوده اولان تاثیرات عطالت
بخشاسندن بشقه ویردیکی برودت سببیله اینخه بر باش
اغریسی کتیرر اویقوی قاپیرر طبیعتہ انقباض ویرر
وبلاحسیات ماده امتائیہنی آقیدیر بوندن طولایی اھالینک
بکزی صولوق وجودلری ضعیف و صوغوقدر بیراملردہ
وبالخاصہ شعبان ماھنک سکزنجی کونندن اون بشنجی
کونی نہایتنہ قدر زیارہ دنیلان پنایر زمانندہ خارجدن
برچوق بدوی وقبائل خلقی کلوب طاولار چالہرق وقلنج
ووقارغی کبی سلاحلرلہ اویناہرق وقت کچیررلر بو ایام
ظرفندہ صباحدن اقشامہ واقشامدن کیجہ ساعت سکزہ
قدر قات یمکن بشقه بر ایش کورمز لر قات یمک عادتی
نفس عدندن بدأ ایلہ ساحلاً چیزانہ و شرقاً صنعانک
ایکی کونلک اوتہسنہ قدر تکمیل تھامہ وجبال اھالیسنی
چوجقارہ وارنجہیہ قدر استیلا ایتمش وجبال نساسی دخی
قاتہ مبتلا بولمشدر .

﴿ قشر وتبا کو ﴾

جبال و تھامہ وعلی العموم یمنیلر قھوہ ایچمیوب
قشر دنیلان قھوہ قبوعنی چای کبی بیوک فنجانلر ایلہ

ایچرلر مذکور قهوه قبوغنی قاوورهرق و ایچریسنه
بهارات قاتهرق صوده قاینادرلر و اوقات سائرده بالخاصه
قاندن وهر وقت یمکدن صکره ایچرلر تهامده خضر
موت محصولی اولان حمومی نام تنباکوی و ولایتک
جهت جنوبیهسنده واقع تعز طرفلرنده سورتی دنیلان
هندستان تنباکوسنی و صنعادن حجهیه قدر کیزرون تسمیه
ایدیلان ایران تنباکوسنی نارکیلهلرده هر وقت و اوقات یر
ایکن متمادیا ایچرلر قات و تنباکویه اولان انهماک عظیم
سببیه کونده حدیدهده الی لیرالق قات و اون بش
یکرمی لیرالق تنباکو صرف اولنور و بو حسابیه عموم
یمنده علی التخمین یومیه ایکی یوز الی لیرالق قات
واوچ یوز لیرالق تنباکو صرف اولنور تنباکودن بشقه
حدیده و تهامه اهالیسی حمومی تنباکوسنک قریندیس
وخشر دنیلان فنا جنس ایله خضر موت قطعهسنده
بولنان بر معدندن بالاخراج کتیریلان و قوم شکلنده
کورینان و ماده محرقهیی حاوی بولنان دقدقه و نام دیگر
عطرون قارشدیرهرق بیوک اغاج هو انلرده دو کیلوب توز
حانه کتیریلان شممه تسمیه اولنور بر مادهیی طوائف
عوام و عمله و حماللر اغز توتونی کی اغزلرینه قویارلر
واریدکجه یکسنی صوقارلر جبال اهالیسی ده بو مکینی

استعمال ایدر لر فقط تنباکو یرینه جبالده چیقان یشیل
یاپراق توتونی قارشیدیر لر مذکور شممه غایت یاقیجی
وتنباکو قدر کیف ویردیکندن بونک تریا کیلری بر زمان
ترك ایده مز لر بوندن ده کونده یکر می لیرالق صرفیات
وقوع بولور.

﴿ کسوه و صناعت ﴾

حدیده و تهامه و جبال والحاصل عموم ینلیار طون
کیمیوب رجال و تهامه نسالی قوته تعبیر اولنور و هر
هانکی نوع قماشدن اولور سه اولسون اوچ بچق ارشون
طوان و بر بچق ارشون عرضنده عورت یرینی ستر ایده جک
قدر بللرینه بر پشتماک صرار لر و عمله و جمال طاقمی یاز
موسمنده یالکز بونکله ایش کور لر شتا موسمنده
حدیده لیلر و جود لر ینک قسم فوقانیسنی بزدن اوکی آچیق
و چاکت کی بر منتان ایله ستر ایدوب تجار و اصناف
و طریق علمیه منسوب اولانلر کوملک اکتسا ایدر لر
حدیده لیلر و خار جده کی شهر لیلر ایله وقت حالی یولنده
اولان اصناف قوطه لری نفس حدیده ده و منظر و در یهمی
و مراوعه قریه سنده و بیت الفقیه قضا سنده متوطن حوکی
یعنی طوقومه جیلرک کار قدیم اوزره اولان اخشاب

تذکاهلرله و قوم اوزرنده طوقودقلری الوانلی پشماللر-
دندر بدوی و قبائل خلقنک فوطه لری زبید قضا سنده سیاه
رنکده بویانان امریقان بزرنندندر حوکیلرک طوقودقلری
پشماللرک ایپکی کاملاً هندستاندن کلان خام پاموق ایپلکیدر
بو قوطه لرک بر قسمی ده ایکی کناری کذلک الوانلی ایپکدن
واغنیا طرفندن سپارش ایدیور ایسه تکمیلی ایپکدن
یاییلور طائفه نسا فوطه اوزرینه غایت طار و صیتی کوملک
کیرلر و کوملکلر ایپک و پاموق هر درلو هندستان قماشندن
وبزندن یاییلور سوقاغه چیق دقلرنده سیاه اوفق سانتر انجلی
شیدر تسمیه اولنور فراجهلره صاریلوب کز رلر حدیده لیلر
قرمزلی و یشیل و صارلی کی الاجهلی رنکدن اوله رق
یایدقلری نسا کوملکلرینک اوزرینه هندستاندن جلب
اولنان سیملی شریدلرله دائراً مدار تزین ایدرلر بو صورتله
حتی بر ریاللق بز ایله یاییلان کوملک اوستنه اقللاً بش
التی ریاللق و اکثریسی سیم کاذب شریدلرله طونادیرلر بو
یوزدن هندلیلرک کتیر دکلری پارلتیلی و ایشلمهلی قماش
و شریدلری التون بهاسنه صاته رق پک چوق تجارت ایدرلر
بو سببدن وقات مصرفندن اهالینک قسم کلیسی فقر حاله
دوچار اولمشلر در خارجدن کلان ایپلکلرله اجرای صنعت
ایدن حوکیلردن بشقه قرا و کویلرده طوپراقدن دستی

وچناق چوملك وكاسه و ابريق و لكن اعمال ايدر لر طائفه
نسانك بر چوغى خرما واك زياده دوم اغاجى يپراقلر ندىن
حصر زنبيل سپور كه يلبازه و اشيا و حبوبات وضعى ايچون
ظروف يپارلر حصير اورمك صنعتى تكميل تهامه نسالرينه
و بر چوق ار ككلره شاملدر بوندىن بشقه شايان تذكر
بر صنعت يوقدر جبال و تهامه نك قبائل و عربانى عموميتله
وشهرلرده اكثر يتله يالين آياق كزر لر اصنافك و فقهانك
قسم جزئىسى اياقلرينه يمنك هر محلنده ياپلقده بولسان
مداعس و قحوف و شاطى ديدكلرى و اياق اوزر ندىن و پارمق
اره لر ندىن مشين قورداه ايله مربوط كوسله دن عبارت
اياق قابى استعمال ايدر لر .

تجارت

جبال و تهامه محصولاتنك قسم كلپسى حديدده دن
عدن طريقه خارجه كيدر اخراجات و ادخالات سنويه نك
قيمتى ايكي مليون ليرا راده سننده در باشليجهسى قهوه در .
اخراجات و لايتك قيمتى ادخالاتك قيمتندن زياده بولنديغى
جهتله ثروت نقطه نظر ندىن يمن اقليمى زنگين بر قطعه در .
ادخالاتك بدلى كفايت ايتديكندن خارجدن يمنه
نقودك جلبنه اولان احتياجات نسبتنده اك زياده قديمأ

آلشدقلى آوستريانك قوشلى رىالى ادخال اولنور سواحل
ولايتدهكى تجارك خارج ايله معاملاتندن طولايى التون
مسكوكاتى وسيم مجيديه يي بيليرلر ايسهده داخلاق ريلدن
بشقه بر سكه بولمز ثروت عموميه ولايت مذكور ريل
سكه اولق اوزره كموشدن عبارتدر .

﴿ معادن ﴾

حديدده معدن يوقدر يالكز ساحل شماليسنده يارم
اطه شكلىده بر ساعت مسافده شاميه ناميله بر ملاحه وار
ايدى . فقط اخيراً ديون عموميه اداره سنجه سدايدمشدره .

﴿ صنوف ممتازه ﴾

اسكى رومالير دورنده اولدينى كى يملك بالخصوص
تهامه قطعسندى صنوف ممتازه عادتى اليوم جاريدر ويدى
صنفه منقسمدر .

صنف

۱ سلاله طاهره نبويه

۲ فقها ورجال علميه

۳ اغنيا و متحيزان واصحاب اراضى واملاك واصناف

۴ خدمه و عماله و رنجبر

۵ قصاب قهوه جى قوندره جى

۶. اخدام یعنی چنكانه‌لر

۷. پروكار و جهام

برنجی و ایکنجی صنف منسوبینی اکثریا حمیت‌مندان
اهالینک اعانه‌سییه اداره اولنورلر. صنوف سائرهنک هربری
کندینه مخصوص صنعتله مشغولدر. هر صنف مادونه
قر و یرمز و فقط مادونندن قر ال‌بیلور. مشایخ و عقال
و مختاران اوچنجی صنفدن انتخاب اولنورلر. دردنجی
صنفه منسوب اولانلردن کسب سعه و یسار ایدنلردن
دخی شیخ اولسی نادر در بشنجی‌التنجی و یدنجی صنفدن
برینک سرکاره کچمسی ممکن دکلدر. اخدام دنیلان
چنكانه‌لر وقتیه هر قبیله خلتنک اشترا ایلدکاری اسرادن
تناسل ایتمش بر عنصر اولدقلرندن یمن تهامه سنک قبائلنده
بونلر الان خدمات شاقه‌ده استخداام اولنورلر و افند
یلرینک خانه‌سندن یر واکتسا ایدرلر. ایکی قبیله بیننده
برقتال واقع اولور ایسه اکاول چنكانه‌لر داخل اوله‌رق
افندیلرینک یولنه جان فدا ایدرلر. حتی خادمک برجرمی
وقوع بولور ایسه افندیسی بلا واسطه ایستدیکی کی
حقنده مجازات اجرا ایدر و مثلاً اعدام ایتسه برشی لازم
کلز. حدیده‌ده حامللرک اکچوغی قبائلدن تخلیص کریبان
ایدرک کلش اولان چنكانه‌لردندر، بونلرک نسا طائفه‌سی

بلا تستر ارککلرله هر یرده کیزرلر و کوندهک ایله قهوه
تجارانی مغازه لرنده قهوه تمیزلرلر بو صنف اهالی سیاه
تنلی قوی البنیه وامراض سائرهدن سالم اوله رق صحت
وجودیه مالکدر، صنوف سائره بغدادی رنگنده
ضعیف البنیه در.

﴿ تهامه ﴾

داخل ولایت ته کیتمک ایچون اک ایشلک اولان
حدیده دن هر طرفه کیدیاور، او جهته داخل سیر و سفر
طریقلری بیان ایدلمزدن اول تهامه نك قبائلی و فصول
ومواسمی وزراعت و اراضی حقیقده شمیدن معلومات
ویرمک مناسبدر. تهامه ایکی قطعه یه منقسمدر. بری یمن
دیگری عسیر تهامه سیدر. شمعی بیان ایده جکمز یمن
تهامه سی اولدیغندن عسیر تهامه سنك احوالیده فصل
مخصوصنده ذکر ایدیله جکدر. یمن تهامه سی جبال
متسلسله یه محاذی و ساحل دن شرقاً جبال مذکور قاعده سنه
قدر اک اوزاغی قرق و الیقینی یکر می بش ساعت و مبدأ
جنوبیسی اولان عدنك لحج قطعه سندن عسیر حدودی
اولان صبا قضا سنه قدر ایکی یوز ساعتک بر مسافه دن
عبارت دوز بر اووددر. تهامه اقلیمی مواسم و فصول

اعتبار نجه هندستانه مائل اولدیغندن سنه ده درت موسم یعنی ربیع و صیف و خریف و شتا موسملرنده یاغمور کلور ایسه ده اک زیاده تهامه یه لازم اولان موسم ربیع ایله صیف یاغمور لریدر. جبال سرا یاغمور لرندن آقهرق تهامه یه یدی سکز وادی کلور و تهامه یاغمور لرینک انضامه میله ده تزیدد میاه ایدرک دگزه منصب اولور. بو وادیلرک اقدیغی طاغلرک اتکلر نده و مجراسنی تعقیب ایدن اراضیده اورمانلر چوقدر، تهامه ده کی اورمانلرک ال بیو کی زرانیق قبیله سی اراضیسنده واقع اورمانلردر. بو اورمانلر تکمیلًا دیکن اغاچلر نندن متشکل اولدیغندن صعب المروور بر حالده در. حتی قبیله مذکوره کو وقراسی بو اورمانلرک آره سنده یاپیش اولدیغندن کندی لری ایچون سپر مدافعه متیخذدر. تهامه اورمانلرینک همان جمله سی دیکن اغاچلر نندن اولدیغی جهتله بیوک وشاهق اغاچ یوقدر، اورمانلر آره سنده بال آریسی بواندیغندن، خرما اغاچلر نندن یایدق لری قوووانلر واسطه سیله اهالی بال آلورلر وادیلرک اسملریله جریان ایتدیکی اراضی فصل مخصوصنده بیان ایدیله جکدر. تهامه لیلر تکمیلًا شافعی المذهب، بغدادی رنکنده و کافه سی اوت و حصیر و اغاچ و قامشدن زروه سی اهرام شکلنده معمول عریش خانهلردن و بعض کویلرده

نادر طاش اینی بدن متشکل اوله رق قرا و کوی بلرده ساکن اولوب خیمه نشین قیائل یوقدر. جمله سی غیر متوحش و طبیعه ملام و عدالتیه مطیع و مائدر، کوزلرینک کورمدیکی شیلره اینانمز لر و سماع اوزرینه خوف و خشیت ایتمز لر ایسه ده قوه جندییه مقاومت ایده مز لر. اکثریسی ساده دل اولدقلر ندن مثلا بریسی کرامت صاحبی اولدیغنی کوسترسه تبعیت ایدر لر بو حال ایله برابر بربرینه تجاوز ایتمدکلر ندن برقبیله دیگرینک سنورنی کچه مز و آره لر ندن قان دعواسی اکسک اولمز. کار قدیم اوزره قلنج قارغی قالقان و بللارینه برقایش ایله مربوط مقوس الشکل ایکی طرفی کسکین اوله رق برقاریش طولنده جبنیه تسمیه اولنان آلت جارحه ایله مسلحدر. شمدی اکثریسی نواصول تفنکلرله دخی مسلحدر. تهامه قبائلی زراعت و فلاح و اغنام بسلامتکله تعیش ایدر اولدقلر ندن بتون سنه تهامه قبائلیک و تهامه ده کی قضا و قرا ساکنه سنک یدکلری قوم داریسی و قرمزی و بیاض داری ایله مصر و صوصام و پاموق و دجره و عترو حور تسمیه ایتمدکلری چوید و بعض یرلرده تیمور هندی و زنجفیل زرع ایدر لر حاصل اولان چویدی تربیه ایتمک طریقنی بیلمدکلری ایچون اصول قدیم اوزره بر چوق کلفیله استحصال

ایتدکلری چویدی بز بویامه سنده استعمال ایدر لر
و حطم تعبیر ایتدکلری صابون مایه سنی ده اولدینی کبی
صانار لر، بومایه بی حدیده ده کی هندتجاری آلهرق بومبای
وهندستانه کوندر لر و بو سببیه بوندن استفادۀ اهالی
کثرتی نسبتدن چوق دوندر. ارضک حائز اولدینی
قوة انباتیه و خط استوایه اولان قریبتی جهتیه معروض
اولدینی حرارت شمس سببیه بردفعه کی اکندن محصول
آلدقن صکره یاغفور کلور ایسه خلف و عقب نامیه
ایکنجی و اوچنجی دفعه ده محصول آلور لر، فقط بو
صورتله آلان محصولک مقداری ماقبلندن دون ودانه لری
اوفق اولور. حبوبات مذکورده اغاچلری قامش کبی اینجه
ویموشاق و دوز اوزون یا پراقلیدر. بو اغاچلره آجور
تسمیه اولنور و کولرده مخروط الشکل پر حالدیه خرمن
ایدهرک ادخار ایدوب حیواناته یدیر لر. تهامه ده قیون،
کچی، اینک، دوه، آت، مرکب، حیوانات اهلیه و طاوق
و طیور سائر بولنور. حیوانات وحشیه دن یالکز قورد
و بعضاً صیرتلان بولنور. تلکی، طاوشان، کیک دخی
واردر. تهامه یه اک زیاده منفعتلی حیوان دوه در، بو
حیوانک تاریخ طبیعیه ده دخی حکایه ایدلدیکی وجهیه
صیدجاقلره و اوزون یولره و احمال و اثقال کشریه اولان

تحملي ويكسزلكه صوسزلفه اولان صبرى هيچ بر
حيوانه مخصوص اولديغندن عربستانك شمندوفرى
دنيسه سزادره. مناقلات تجاريه نك كافه-ي دوه واسطه سيله
نقل ايديلور وتهامده حمل ومؤتى اولان وعائله جه
وقوعبولان سير وسفر اهالى دخى دوه ايله اجرا
ايديلور. جهت انتفاعده مركبلرده ايكنجى درجه ده
قالور. تهامه نك هواسى شتاهوسمنده كيجه سرين
اولور سده كوندوز معتدلدر واو حالده ينه كوشده
كزلك قابل دكلدر. ياز زماننده ايسه كيجه هوا صيچاق
ايسده نم دوشديكندن حديد و سواحلى قدر
صيقندى ويرمزوتردن اضطراب چكلمز كوندوز
وقتى اووه لرك سموم روزكارى اسر وياغمور اولديغى
سنه لرده بو هوا توز وطوپراقله قاريشيق غايت صيچاق
اولور. تهامده هنوز بر معدن كشف اولمديغندن
معدندن خالى اولمق كر كدر. تهامه ليلر طلق اللسان
وسر بست ومهماننواز طبيعته دره. صقاللرينى بتون بتون
طراش اتمزلر فقط بيقلريله صقاللرينك چكويه قدر
اولان يرلرني تراش ايدرلر. طائفه نسا فوطه ايله
اوزرلر يسه اكثر يا سياه وبعضاً قرمزى رنگده كنيش
كوملك كيپرلر تهامه نسالرى حصيراورمكله برابر حيواناته

يم ويرمك و خانہ ايشنى كورمك و چاشورى بيقامق
ويمك پشيرمك و حطب كتيرمك و وقت حصادده برلكده
ترلايه كيتمك خدمتلىرىنى كوزرلر باشلرينه كونشدىن
محافظة دوم اغاجى يپراقلرندىن كندولرى اوردكلىرى
قباع تسميه اولنور كىنارى سپرلى حصير كيرلر ار كىكلر
دخى چىمت سورمكه كىتدىكندە يىنه بووجهاه و فقط انكلىز
شابقه لرى شكلىنده اوستى قبه لى شمس سپر كيرلر . بازار
و پىلر يرلرينه اشياىى طائفه نسا دخى كتوروب صاتارلر .
شهر و قصبه لرده و كولره كىتدكلرندە ار كىكلر كى حيوانه
بمىوب ايكى اياغى بريانده اولمق اوزره حيوان اوزرندە
اوروپا مادامه لرى مثللو وضعيت آلورلر . تهامه نسالرى
تناسب اندام ايله حسن جماله مالكدر . تهامه ليلر يك
ساده دل اولدقلىرى يوقاروده بيان ايدلمشدر . بونلر اك
زياده ساداته انقيا ايتدكلرندىن تهامه ده كى سادات احوالندىن
دخى بخت ايتمك فائده دن خالى دكلدر . سلاله طاهره
هاشميه دن اولان الاهدل نسلندن بولنان تهامه ساداتى
اهدلى و مقبولى نامنده ايكى قسمله معروفر . بونلر اك
مرکزلىرى حديدیه شرقاً اوچ بچق ساعت مسافه ده
واقع مراوعه قصبه سى اولمق و عمومى مراوعه نك پوست
نشيننه مربوط بولمق اوزره حديدیه جنوباً اوچ ساعت

مسافهده دریهی وینه حدیده نك شرق جنوبیه سنده
القی ساعت مسافهده واقع منصوریه و مراوعه نك شرقنده
وایکی ساعت بعدنده قطیع وحدیده نك شمالاً اون ایکی
ساعتلك بعدنده منیره قصبه لری وارددر . بو قصبه لرده
برر پوست نشین سادات منصوبدر . وفاتی وقوعنده
اولادینه ارثاً انتقال ایدرك خارجدن کیمسه نصب اولنمز .
هر قبیله خلقی کندی طوپراغنده کائن مذکور قصبه لرك
پوست نشیننه مراجعت واره لرنده ظهور ایده جك منازعاتی
صلحاً فصل ورؤیت ایتدیررلر . جوار قبائلنده مقدس
اولان بوسیدلرك ویره جکی رأی وقراری مختلف اولان
طرفین بالقبول سیددن بر فاتحه آلهرق صاوشورلر .
انقیاد ایتیهرك مخالفت ایدن طرف هر حالده مظهر جزای
ربانی اوله جغنه اعتقاد ایتدکلرندن سیدك صلحنی قبول
ایتمیان جهت خلقنه هر نه حادثه ومضرت اولور .
ویا خود قور اقلق حاصل اولور ایسه عدم اطاعتلرندن
ایلرو کلدیکنه حمل ایدرلر و بو یولده بربرینه
تلقیناتده بولنورلر . بو ساداتك دائرة مقدسیتی
جنوباً زبید قضا سندن بدأ ایله شمالاً حیه قضا سنه قدر
قرق ساعتلك برقطعه داخلنده محدوددر . ساداتدن بری

بودائره داخلنده کی قبائل افرادندن حتی الکی بیوکنندن
قر طلب ایده جک اولور ایسه مع الممنونیه تزویج ایدر لر.

— خدیده دن ولایت وارد و مرکزى —

— اولان صنعا طریقى —

خدیده دن صنعا یه قدر مسافه بریه اللى التى ساعت
اعتبار اولور ایسه ده اشیای تجاریه نقل ایدن دوه لر
صنعاور طریقیه اون ایکی کونده و حراز طریقیه سکنر
کونده کیدر. صنعا و علی العموم جباله کیده جک اولانراستر
وبار کیره را کب اولور لر. یولجیلر دائمی صورتله حراز
طریقیه استره را کباً کیتدکاری جهتله بیان ایده جکمنر
یول طبیعی حراز طریقى اوله جقدر. خدیده دن صنایه
کیتمک اوزره ایلك قوناق یری اولان و خدیده نك شرق
شمالیسنده اون ساعتلك مسافه ده بولنان باجل قضا سنه
هم مراوعه طریقیه و همده طوغریجه کیدیلور. مراوعه
طریقى ایکی ساعت زیاده و قومسال بولندیغندن طولانی
یولجیلر ایچون دائماً طوغری یول اقرب وار حیدر.
خدیده دن اوچ بچق ساعت سفردن صکره بر قهوه یه
واریلور. اورادن یا جله قدر مسافر ایچون قونه جق

مخصوصی قهوه و خان یوق ایسهده یول اوزرنده کویئر
واردر . باجل قصبهسی اوفق بر سلسله جبالک شمالاً
صحراسنده واقع بشیوز عدد عریش و کارگیر خانهلی
وبیک ایکی یوز قدر نفوس اسلامیه بی حاویدر . قضا
مرکزینک هواسی و خیم و صوینی آغر اولدیغندن مخا
کی ستمهسی مشهوردر . باجل تهامهده واقع اولغله تهامهیه
دائر کذران ایدن احوالدن بشقه شایان تذکار بر
خصوصاتی یوقدر . باجل قضا سنک قحرا اسمیله معروف
اولان قبیله ایله برابر نفوس عمومیهسی یکر می بیك
راده سندهدر . شمالنده هر بری سکز بیك نفوسلی
جبل ملجان و جنوبنده جبل برع ناحیه لر یله یکر می بیك
نفوسلی جبل ریمه اسمنده بیوک بر قضا موجود ایسهده
جبال سرادن معدود ایدوکندن طبیعت و زراعت و احوالی
جبال فصلنده بیان ایدیله جک خصوصاته تابعدر . باجلدن
شرقاً التي ساعتده بحیح نامنده کی قریهیه و اورادن سکز
ساعتده تهامه نك شرقاً منتهای حدودنده حجیله موقعنه
کیدیلور . حجیله حراز طاغ نك تهامهیه متوجه غرب
طرفنك اتکننده اوفق بر قریه دن عبارتدر . طاغك جریان
هوایه حائل اولسی سببیه هواسی و خیم و صوینی غایت
فناذر . تضییق هوا ایله برابر سیوری سینك تخته تی

اشك آریسی حیوان تی کبی حشرات مؤذیه نك مجتمعیدر .
بر ساعت اول حرکت ایتمك هر بر یولجی ایچون عنیمت
ایسهده عوارهن جبال وقت انتقال خصوصنی یالکیز
کوندزه حصر ایتمدیکندن طاغیرك کافه سنده سیر و سفر
بتون کوندز وقوع بولدیغنی ایچون حجیلهیه ایشام
کلنه جك اولور ایسه حراز طاغنه صعود ایتمك اوزره
صباحه انتظاراً اوراده کیجه نی کچیرمك مجبوریدر .
حجیلهه موقعی تهامه نك صوك موقعی اولدیغندن اردوی
هایونك ارزاق و مهمات نقلیاتی جهتندن اهمیتی حاز
عسکری استاسیونیدر . حجیلهدن مناخهیه قدر اون ساعت
مسافه واردر . اولاً ایکی طرفی مرتفع طاغیرله قیالردن
کچن دره لردن بالمرور طولاشقلی بر صورتده تسویه ایدلمش
اولان یقوشدن حراز طاغنه صعود اولنور . اوچ ساعتده
بر حوض باشنه و اورادن ایکی ساعتده عتاره قریه سنه
وقریه دن دخی بش ساعتده حراز قضا سنك مرکزی اولان
مناخه قصبه سنه چیقیاور .

— حراز —

مناخه قصبه سی سطح بگردن تقریباً ایکی بیچق کیلو
مترو ارتفاعنده اولان شیام العیار نام صرتك اوستنده

طولانی برشکده بر وایکی قات ارتفاعده قیا طاشندن
یایلمش کارگیر خانه لری حاویدر . قصبه دن کورینان
اطراف تپه وزروده لرده بر چوق کولری اولدینی کبی
طاغك هر بر جهتنده قریه لر حتی مناخه نك دها یوقاریسنده
واقلاً بر کیلو مترو ارتفاعنده اینیه لر مشاهده اولنور .
هوایی سرین و صحیحدر . و تبدیل هوایه محتاج اولنلر
نافعدر .

قصبه وقرانك ایچدکلی صولر طاغك زروده سندن
جریان ایدر . یاغمور صولریله بوصولرک تراکم وادخاری
ایچون صورت مخصوصده انشا ایدیلان حوضلردندر .
صنعا سنجاغنه تابع اولان قزارك اک معمور وزنکین
و محمولداری بولنان حراز قزاسنك متفرقاً ساکنه سی
یکرمی بیک اسلام و اوچ بیک موسوی نفوسدن متجاوزدر .
بو طاغك اوستنه چیقلدینی مدتجه و هر هانکی مرتفع
بر نقطه دن باقد قجه زمرد پارچه سی کبی سراپا یشلک لرله
مستور کورینور . جبال یمانیه ایچنده حراز قضاسی
حائز رجحان بولندیغندن جبال سراپه هاند اولان
تفصیلاتک بوراده ذکر یی ترجیح ایدلمشدر .

— جبال سِراة —

جبال متسلسلهء سِراة جنوبدن عدنده واقع بنی مجید
ذیچان معافردن بدأ ایله شمالاً طائفه قدر متواصل اولان
درت یوز ساعتهك سلسلهء جباله سِراة اطلاق اولنور
ایسهده بونلرك اك محصولدار و معموری یمن طاغلریدر .
مورخین عربك یمن ایچون جبالها جناتها دیدکاری کبی
جبالك یالکیز عارضهلی و مخروطی اولان یرلرندن ماعدا
قاعدهسندن زرومهسنه قدر صرتلری اوزرینه اوزاقدن
طبقی نردبان منظرهسینده کوریتان تارلاجقلر بربری
اوزرینه چیقمش و تکمیلانده باشلیجه و کثرتله قهوه
اغاچلریله قات و حنطه و اریپه و علس و مرجک و داری
و عتر و بقله و مصر حبوباتیله اوزوم نار آیوا شفتالی قایسی
دوت الما طرنج لیمون و هندستان میوهلرندن آمبه و موز
واغاچ قاوونی و دیگر یشیل آمبه و بادم کبی فواکهك
وکل و فسلکن و یاسمین مثللو ازهار و سهبزه لرك انواعی
مزر و عدر . جبالده باکچو قدر و توتون دخی مزر و عدر .
قهوه بر بچق ایکی متر و ارتفاعنده اینجه اغاچاری حاوی
بر نباتدر . وقتیه بو دخی قات کبی آفریقانك حبش
طاغلرندن جلب ایدیلان فدازردن یتشدیرلمش ایسهده

جهانك الكنفيس ولذيد قهوه محصولانى وجوده كثير مشدر
 محصول جبال سنه دهه ايكي دفعه ربيع و خريف اولوب
 قهوه محصولى انجق سنه دهه بر دفعه فقط حجور و جبل
 برعك طبيعت اراضيه سى سنه دهه ايكي دفعه محصول ويرر.
 جبالده هر كون ساعت طقوزدن بدأ ايله اون بره و بعضاً
 اقشام وقتنه قدر ياغمور كلور. بو حال يمن طاغلر نده غير
 مختلف بر طبيعتدر. اهالى صباحدن ساعت طقوزه قدر
 ايشاه مشغول اولور و طقوزدن صكره ياغموره انتظاراً
 يرلرينه چكيلور. كونش طلوع ايتزدن اول طاغلك
 قاعده سييه سطح زمين كور نيمه جك بر حالده بولو طلر له
 مستور كورينور كونشك ارتفاعيله زائل اوله رق ساعت
 طقوزه قدر هوا براق و طاغلك هر طرفى كونشدن
 ضيادار بولنور. اشاغيدن يوقارويه طوغرى كلان
 بلو طلك رزاتى نجره لردن او طه لره كيروب چوق دفعه لر
 او طه ايچنده ماده بخاريه مذكوره زراتى بر برينه التيام
 ايدرك ياغمه باشلاديني چوق دفعه لر مشهود اتدندر. جبالده
 بولان قصبه و كويلرك كافه سى سياه طاشدن اوله رق
 كار كير خانه لردندر. كيجه وقتى هيچ بر كيمسه سا كندن
 چيقمز. اهالى عربجه تكلم ايدر لر ايسه ده اسامى
 واصطلاحات موضوعه سائر لرى عن اصل هم بر قبائل

قدیمہ سی نسلندن کلدکلری جہتلہ شیوہ تکلملری تہامہ۔
 لیلرک صورت مکالمہسندن بسبتون بشقہدر۔ موسویلر
 عربجہ و عبرانیجہ تکلم ایدرلر۔ تہامہ ایلرہ نسبتہ جبال
 اہالیسی دہا ذکی و سرعت انتقالہ مالک و فطیندر و تہامہ۔
 لیلردن دہا مشکل وقوی البنیہ وجسورددر واسلحہ
 قدیمہ وجدیدہ ایلہ مسلحددر۔ اماثیلی و مزاح خصوصندہ
 شاطر اولدکلری کی قات و تنبا کویہ منہمک و مکیفات
 سائرہ یہ مائلدر۔ مشرقی ویافعی ناملریلہ اولان قواعد
 تغیلری کوزلدر۔ اہل کیف اولدکلرندن طرب دیدکلری
 عود و مزمار و چالغی نی پک زیادہ سورلر۔ حراز قضاسی
 سکنہ سنک اکثریسی ایلہ بلاد ہمدان اہالیسنک بعضیسی
 ویام قبائلی اسماعیلی مذہبندہ و صنعا و یریم و ضمہار و رداع
 و آنسی و عمران و حجه قضالری اہالیسی ایلہ حاشد و شہار
 قبائلی زیدی مذہبندہدر۔ ارککلر ذکری سابق ایدن
 سیاہ بویالی آمریقان بزندن فوطہ و صاریق کیرلر۔
 موسویلر سیاہ بزندن دیزلرینہ قدر برکوملک و برطاقہ
 کیرلر۔ زولقلری چککیہ قدر اوزادرلر، تجاران ایلہ
 صنف علمیه و فقہیہ منتسبینی کنیش قوللی بیاض کوملک
 و بیاض صارق کیرلر۔ علی العموم جبال ہواسی موسم
 شتادہ یابس صغوق و یاز موسمندہ سرین اولدیغندن

طولایي صغوقدن محافظه وجود ایچون یاری بویلرینه
 قدر قولسز وتوی طرفی وجوده کلمک اوزره قیون
 دریسندن یایدقلىرى دقای کیهرك يالکز قسم فوقانیسی
 صغوقدن اورترلر. طائفه نسا دخی غایت طارطون کیمکله
 برابر اوستنه کوملك کیرلر وهربری خدمت بیتیه پی کورمک
 وصو وخطب کتیرمک و حیوانات قیلندن ایپلک اورهرك
 کچه یایمق جبال نساسنک ایشیدر. جبال اهالیسی خانجی
 وقهوه جی صنفی تهامه قسمنده ذکر ایدیلان صنوف
 اهالینک بشنجی درجه سنده طوتارلر. جبالده تهامه دهکی
 حیوانات اهلیه نك کافه سی بولمغله برابر طاغ کچیسى وکیک
 وطاوشان وتلیکی و صنصار بولنور. انواع طیور صیدیه
 وبریه واردر. اودییه یعنی یاغموردن تراکم ایدن صولر برر
 مجرا ایله طاغلك آره لرندن تهامه یه جریان ایدر. برچوق
 آقار صولر وچایر واورمانلر موجود در. جریان ایدن
 وادیلرک جبالک تپه لرندن آشاغی یه طوغری تشکیل
 ایلدکلری خط اجتماع میاهدن وجوده کلمکده در. بونلرک
 باشلیجه لری موزع و شفاق ورمع و سهام و سردود و مور
 و بی عیس و خلب نام سکز دره اولوب موسملارنده
 مجرالرنده واقع اراضیلری کاملاً سقی واروا ایتدکن

صكره دكزه انصاب ايدر. موزع وشقاق واديسى زيحان
 ومعا فردن دوشهرك نخله وسجاري وزبيد نامريله اوج
 بيوك مجرايه آريلوب دكزه منتهى اولور. رمع واديسى
 دخى جهراندن بدأ ايله الهان و آنس جهتندن دوشهرك
 سربه وجيلان و ريمهك جنوبندن بالمرور زرانق قبيله.
 سندن بحره دو كيلور. سهام واديسى ايسه حضور واخروج
 جهتندن بدأ ايله حراز والهان وعشار وبقلانك جهت
 جنوبيسندن و آنس وجيلان و ريمه وبرعك جهت شما.
 ليه سندن بالمرور جاحف و سهام نامريله ايكي مجرايه
 آريلوب جاحف مجراسى منصوريه ودرهيمى وقضبسه
 اراضيسندن و سهام مجراسى سراوعه و حديدك جهت
 شماليه سندن كچهرك دكزه كيدر. سردود واديسى اهر
 وشيام وماطخ وصيله دن سقوط ايدر ك جبل تيس و انصار
 وبكيل وقهميه وحفاش جبالنك جنوبندن وضحى قريه سنك
 شمالندن كچهرك كذلك دكزه كيدر. مور واديسى ايكي
 قسم اولوب بر قسمى همدان وخولان وحمير اراضيسندن
 طوغريجه ليه شهرينك ايكي طرفنى احاطه ايدر ك دكزه
 قاريشور. ايكنجى قسمى وادى مير ناميله شحيب وعاهم
 بلادينك جهت جنوبيه سندن مرور ايدر. بنى عيسى
 واديسى دخى حجور جبالنك جهت سفلا سندن كلهرك

حرض اراضيسندن بالمرور شقيقه قدر كيدوب ساحله
دو كيلور. وادى خلب حضوب وقصاعه وبامه نام محللردن
كچهرك بر قسمى حرض واديسنه وتعشر وصيد وملحه
وليه وچيزان وضلحد نام اقسامه آريله رق دريايه كيدر.
غير مسكون اورمانلرده وعواض جبالده بيرتجى حيوا.
ناتدن سپاه بنكللى قپلان وصيرتلان وقورد بولنور.
ونادرا آبي دخى كورينور. يمن طاغلرنده پك چوق
ميمون بولنديغندن مزروعاته ضرر ايراث ايتمكده در.
چكر كه دخى پك چوق بولنور ايسه ده بيكلر جه اهالى
دائما اولرلر، وصيجاق صوده خاشلايوب چواللر طولوسى
كولرده ادخار ايدر ك يرلر. وقت حالى يرنده اولانلر ساده
ياغنده قاووررلر وير ايكن يالكز باشنى قوپاروب آنارلر
حتى فقرا طاقى ايچون بو حشرات دائمى برغدادر. جبال
سرادن آنس ورداع طرفلر نده قاپليجه لر موجوددر.
جوار اهاليدن امراض اولانلر بو قاپليجه لره دوام ايدر ك
اكتساب عافيت ايدرلر. تاريخلره نظراً ازمنه ماضيده
جبالك بر چوق محللر نده كموش وقورشون وتيمور معدنلرى
وتعزده كى جبل صبرده آلتون معدنى بولنديغى مسطوردر
وبوكى معادنك موجودتى وقتيله ايشلايدلان وخولان
ايله همدان آرسنده وتهم وسارع وجبل نقم وشيام

وصعدا نام مواقعه موجود اولان او جا قلك خرابه
 و اوچروملى اثاريله ده اليوم متواتر و مذکور ايسه ده
 هنوز كشف ايديله مامشدر. صنعانك قارشو سنده كى جبل
 نقيم و آنسده جبل ضوران و زمارده كى جبل هران نام
 طاغرده قرمزى و مائى و بياض رنگه چيقان و بعضارى
 بر طاقم اشجار و انسان و حيوان رسمى طبيعتاً حاوى
 بولنن عقيق يمانى موجوددر. بنى حشيش و بنى حارث
 ناحيه لرنده آلچى و حده نام قريه ده كرج و وادى سر نام
 محله رخام تسميه ايديلور. شفاف مرمر و رداع و صعده
 بياض و سياه مرمر موجوددر.

﴿ حرازدن صنعايه ﴾

مناخه قصبه سندن درت ساعتده طاغك قاعده سینه
 يعنى وادى يه اينيلور. بومسافه نك نهايتنده عجز ناميله بر
 قهوه وارددر. اورادن مقحق ناحيه سنك چارشو موقعنه
 ايكي ساعتده مواصلت اولنور. مقحق نام ناحيه مركزى
 اولان مرتفع طاغك اوزرنده عسكرى انبار و ابنیه سی
 مشاهده اولنور. اورادن آلتى ساعتده سوق الخميس
 نام قوناق يرينه كلنور. سوق الخميسدن درت ساعتده
 بوغان موقعنه اورادن ده ايكي ساعتده مته دنيلان و انشا

کرده سی اولان بیوک حاوض و خان سببیله نامنه نسبتاً
سنان پاشا اسمیلهده یاد ایدیلان قوناق محله موصلت
اولنهرق اورادن درت ساعتده عصر عقبه سندن بالمرور
صنعايه دخول اولنور.

﴿ صنعا ﴾

عصر عقبه سنك جنوباً شرقنده و جبل نغم نام كوچك
طاغك شمال شريفينده واقع دوز اووهده جنوبدن شماله
طوغرى مستطيل و دائراً مدار سور ايله محاط اولان
صنعا نام شهر اون بش درجه يكرمى ايكي دقيقه عرض
شماليده و اوتوز ايكي درجه اون درت دقيقه طول شرقيده
واقع التى بيك قدر كار كير خانه يي و جوامع شريفه و خان
و حماملى و يكرمى بش بيك اسلام و بش بيك موسوى
اولق اوزره تخميناً اوتوز بيك نفوسى جامعدر. ابنه لرى
جسيم و خارجاً مزين ايسهده تقسيمات داخله لرى منتظم
دكلدر. صنعا نك وسطندن غيل الاسود جريان ايدر و بر
چوق باغچه لرى وارددر. غيل مذكور دن اهالى صو
ايچميو ب قيو صويندن ايچولر. نفس صنعا لى اسلام
و موسويلر بياض تنليدر. طوقومه جياق و قيو مجياق
و صنايع سائره ايله تجارت و مناقلات و اخذ و اعطا ايله

اشتغال ایدر لر . غایت بیوک چارشوسی واردر . باغ
وبغچه لری حاوی اوچ چاریک مسافه ده روضه وایکی بچق
ساعت مسافه ده وادی ظهر وبر بچق ساعت مسافه ده حده
نام قریه لر بولنوب صنمانک صیفیه لریدر . اوزوم ایوا
شفتالی آرمود الما اکشی و طاتلی لیمون اغاچ قاوونی
طرونج ، قارپوز ، قاوون ، اینجیر ، نار ، طوت ، اریک ،
زردالو ، قایسی ، جویر ، بادم و سبزواتدن انکنار ، بامیه ،
باطلیجان ، ملحیه ، میدانوس ، نعنع ، چالغم ، پانجار ، طورپ ،
لحنه ، قارنهار ، سسمیز اوتی ، اسپناق ، مارول ، پازی ،
حاوج ، دره اوتی ، طوماتس ، پتاتس ، کره ویز ، قباق ،
فصولیه ، بزلیه موجوددر . کول ویاسمین وازهار لطیفه
چوقدر . تواریخک بیاننه نظراً صنعا شهری بوندن درت
بیک سنه اول سام ابن نوح طرفندن تأسیس اولمشدر .
اطرافنده ظهور ایتمکده اولان آثار عتیقه « حم بریه »
ومسکوکات قدیمیه و حفریات اجراسنده بولمقده اولان
هیکل و احجار اوزرنده کی تواریخ صنمانک پک چوق
قدیم بربلده اولدیغنی تأیید ایدیور . صنمانک هواسی
موسم شتاده قوری صغوق اولوب صولری انجماد ایتدیرر .
موسم صیفده پک کوزلدر . یالکنز پیره نک کثرتی مؤذیا
تدندر . ذکری سبق ایدن حراز قضا سنندن بشقه صنمانک

جهت شمالیه سنده کو کبان و حجه و عمران و جهت جنوبیه -
سنده آنسی و زمار و پریم و رداع نام قضاار و بر چوق
نواحیلر موجوددر . هر بر لرینک نفوسی اونر بیک
راده سندهدر . بونلر کاملاً جبالدن بولندیغی جهتله احوال
جغرافیا و سائر هسی سلسلهء جباله تابعدر . بونلرک وضع
و جسامتلی صره سیاه ذکر ایدیله جکدر . بوقضالر قبائلی
و مشرق و حاشد و شهر و یام و الحده و یافع قبائلی فعالیت
شجاعت و جسارتله مشهور مشکل الهیکل عظیم الجثه
عرباندندر .

﴿ صنعادن جنوباً تعزه قدر ﴾

صنعادن جنوباً اوچ ساعتده حرز قریه سنه و اوچ
ساعتده بر بوغاز ایچنده واقع و علان والتی ساعتده واقع
اووهده کائن معبر قریه لرینه والتی ساعتده ضمار قصبه سنه
واریلور . بوقصبه ایکی بیک قدر خانه یی و تخمیناً اون بیک
قدر نفوس اسلامیه و موسویه یی حاویدر . ضمار دن یدی ساعتده
پریم قضا سنه موصلت اولنور . بیک ایکی یوز قدر خانه یی
و بش التی بیک قدر سکنه یی حاویدر . جهت جنوبیه سنده
عین المریم نامنده اقرار بر صوبی وارددر . اراضیسی غایت
منبت و محصولدار اولوب زراعتله مستورددر . پریمدن درت

ساعتده حماره وايكى ساعتده مخادر ناحيه سنه واورادن
اوچ ساعتده ايب قضا سنه مواصلت اولنور. ايب قصبه سي
بر صرت اوزرنده سور داخلنده يدي سكر يوز خانه يي
واوچ بيك قدر نفوس اسلاميه يي جامع اولوب غايت منبت
ومحصلدار اراضي سي واردر. سراپا مزرو عاتيله مزيندر.

○ تعز ○

ابدن اوچ ساعتده صياني وبش ساعتده قاعده ودرت
ساعتده بعدان طاغتك شرقندن تعز قصبه سنه كلنور تعز
جبل صبر دنيلان يوكسك طاغتك شمالاً اتكنده غير
مستوى تپه جكلرك اوررنده سور ايله محاط بشيوز قدر
خانه يي تحمينا ايبى بيك مسلم ويوز قدر موسوى نفوسى
حاوى مركز لوادر. جريان هوايى سد واخلال ايدن
طاغتك اتكنده اولسى وشمالاً هشمه اسپمنده بر كولى
بولنسى جهتيلاه هواسى وخيم و ستمه وتخمه خسته لنى
دائيدر. تعزك جهت شمال شرقيسنده يكرمى ايبى ساعت
بعدنده عدين ناميله متفرق كولى واون بيك نفوسى
حاوى محصولدار برطاغ وكذلك اون بيك نفوسلى حجرية
نامنده وتعزك شرق جنوبيسنده اون التى ساعت مسافده
متفرق خانه لرى ومياه جاريه يي شامل منبت ومحصلدار

بر جبل وارد در . بونك جهت غرب شمالیسنده التي ساعتك
 مسافده مظنه دن شيخ احمد ابن علوان حضر تارینك
 عرقد شریفلریله بر جامع وزوار ایچون او طه لر
 موجود در . ذکری بالاده مسطور اولان مخابله . سیده
 تعزك جهت غربیسنده رماده نام چارشو طریقله یگر می
 ساعت بعدنده در . تعزك جنوب شرقیسنده یگر می ساعت
 مسافده قعطبه نامیله بر قضا وارد در . یوز قدر خانه بشیوز
 قدر نفوسی بولنوب اراضیسی منبت و محصلولدار در .
 تعزدن عدنه کیده جك اولانار قعطبه دن بالمرور اوتوز التي
 ساعتده عدنه دخول اولنور .

تعزدن شمالاً حدیدیه قدر

تعزدن اوچ ساعتده بیوجك بر کوی حاوی رماده
 چارشوسنه و بش ساعتده هجده کوینه و اوچ ساعتده
 قبعه چارشوسنه و اوچ ساعتده مضروبه کوینه و ایکی
 ساعتده حیس ناحیهسنه مواصلت اولنور .

حیس

حیس قصبهسی دوز اووده اکثریسی طاشدن بر
 او طه لر یله عریش دنیلان حصیر و اغاچ خانه لردن متشکل
 بش بیک قدر نفوس اسلامییه بی حاویدر . اسمی بالاده

گذران ایدن وادی سجاری نام دره حیس اراضیسندن
مرور ایتدیگی جهتله محصولدار اراضی بی و یوز بیك
اغاچدن متجاوز خرما اشجارینی مشتملدر . بوناحیه نك
عموم نفوسی یگرمی بیك راده سنده در .

﴿ زبید ﴾

حیسدن بر ساعتده دجره و بر ساعتده مساجد
قهوه لرینه و ایگی ساعتده جراحی قریه سنه و ایگی ساعتده
زبید قصبه سنه موصلت اولنور . زبید قصبه سی دوز
اووده و جنوبدن منحرفاً مربع شکلنده سور ایله محاط
سیاه طوغله دن خارجاً کیرجسز بش بیك قدر یر
اوطه لرینی حاوی خانه لری و طار و طولاشقلی زقاق لری
واون بیك نفوس اسلامیه بی شامل و هجرت جلیله
نبویه دن ایگی عصر صکره خلفای عباسیه زماننده تأسیس
اولمش بیك یوز سنه لك قدیم و تجارتگاه بر بلده در .
تهامه نك اك بیوك و معمور بر شهریدر . طبایع و احوال
عمومیه سی تهامه فصلنده مذکور اولان حالده در .
سکنه سی مدنی و کافه سی شافعی مذهبنده پك چوغی
فقها و علما و مدرسین و سادات و شرفا اولق اوزره اهل
فضل و دیانتدر . بوقسم اهالی کنیش یالکز بر کوملك

وبیوجك بیاض صارق اکتسا ایدرلر. عوام و عریان
قسمی چبلاق دنیله جك قدر ستر عوزت خصوصنه اعتنا
ایتمیوب دیزلرینک اوستنده بر بجاقلری اوکدن کاملاً
ودیکری قسماً میدانده اولمق اوزره امریقان بزندن بر
فوته وکوکسلی آچیق اوله رق بر قاریش بوینده منتانه
مشابه ارقه لرنده بریلک اولدیغی حالدده باشلرینه سیاه
بویانمش درت بش قیه ثقلتنده صارق صارارلر متقدمینک
اوقاف عظیمه سی تکمیل یمن و عسیر و افریقا قطعهلرندن
تحصیل فقه ایچون کلان یوزلرجه طلبه علمی انفاق
واعاشه ایتمکده در. ولات سالغهدن نشار مصطفی پاشانک
اثری اوله رق بش بیک نفوسی استیعاب ایدر. غایت
جسیم جامع واسکندر پاشا جامعی نامیله ایکی بیک نفوس
آلور دیگر برجامع شریف ایله قدیم اشاعر و علویه
ودها اوتوز قدر جوامع و مساجد شریفه موجود
ومعمورددر. مساجدک اکثریسی برر مدرسه حالنده
ومدرسیندن تحصیل علوم ایدلمکده در. بوندن باشقه
بیوک چارشولری بالمله جبال و تهامه اهالیسنک اکتسا
ایلدکلری سیاه امریقان بزلیرنک متعدد بویا خانهلری
برچوق بز طوقومه جیلری و صنایع سائره دستکاهلری
قیوجی، تیمورجی صنعتکارلر متعدد و کثیردر. نفس زبید

ایله بتون اطرافى معمور و قرا و کویلى نفوس ایله
مملودر . كاملاً زراع قسمندن اولوب باشلیجه مدار
معیشتری زراعتدر محصولات محلیه و منقولات تجاریه
واجبیه اثماني سنوی اوچ یوز بیك لیرادن متجاوزدر .
برچوق اراضی و املاك و تجارت و ثروت و سامانه مالك
اغنیاسی چوقدر . بالاده قسم مخصوصنده بیان اولنان
وادی زبید کوله و مقصع جهتنده درین و بتون سنه اقرار
اولق اوزره ایکی مجرایه انقسام ایدن دره لری اراضی
عالیه بی بتون سنه اسقا واروا ایدر یا غمور لرك تزایدیه
فیضانی زماننده دکنزه قدر نهر حالنده انصباب ایدر .
ایم سائرده فازه ساحلنه تحت الارض جریان ایدن میاهی
لب دریاه بیوک بیوک کوللری دائماً مملو بولندیروب
شمال و جنوبه سیر و سفر ایدن مراکب و سفائنک کافه سی
اورادن صو آلور . وادینک اراضیه اولان فیضی
و برکتی سنه ده آداری و صیفی و قیرع و کانونی نامیله درت
دفعه زراعت موسمی یتشدر مکده در مجلس و وادی
زبید و تحتیه و مغرس ناملریله ساکنز یوز بیك عددی
متجاوز خرما آغاچلری بولمقنده در . متصرفین قدیمه دن
کرد احمد پاشانک زبیده و یردیکی کوچک هندستان نامنه
بحق سزادر . محصولاتى تهامیه مخصوص حبوباتک کافه سی

ایله خرما وچوید وپاموق و فواکه و سبز و اتدر .
 ایچدکاری صو مملکت ایچنده کی قیولرک صوییدر . بوصو
 اساساً وادین صیزان صودن عبارت اولوب پک اغری
 ووخیمدر . مملکتک منحط بر موقعدہ بولنسی واطرافده کی
 اراضینک صولاق و مزرعه اولسنی ذاتاً صیجاق و توز
 و طوپراقله قاریشیق اولان هواسنی اخلال ایدرک ستمه دن
 یالکز موسم صیفده انسا قور تیلہ بیلور ایسه ده موسم
 شتاده حما ایله برابر بتون سنه معده ستمه سی هضم سزاق
 طنلاق ، باصور ، فقر الدم خسته لقلری دائمیدر . اهالیسی
 صیصقه و قانسز صاری رنگه در . هله سیوری سینکی
 حساب سزدر . عقرب وییلان چوقدر . ما موریتله اوراده
 ایکی بچق سنه اقامت ایتدی کمده قطعاً صوینی ایچمیوب نسبتاً
 صحیح و خفیف اولان بیت الفقیه قصبه سندن جلب ایتدی کم
 حالده بیلہ امراض مذکورهدن قور تیلہ مامش ایدم زبیدک
 شرقاً بر ساعت بعدندہ اویس القرنی حضر تلرینک
 مقامی وزوارک بارنسی ایچون سرقرین سابق حاجی
 علی پاشانک طاشدن انشا ایتدی ردکاری تربه و حولیلریله
 برابر ایکی اوطه واردر . کذلک شرقنده کرج معدنی
 بولنوب اورادن چیقاریلان کرج ابنیه ده استعمال اولنور .
 شرقنده هر بری یگر می بیکن نفوسلی و صاب عالی

ووصاب سافل وشرق جنویسندہ دیاس وچیل راس
نامندہ کی جبال منبت و محصول دارد . جهت غربیسنده
تحتیه نامیله بیک بشیوز نفوسی شامل اولان قریه تجارت
ومعموریتله مشہر در . اورادہ چویدی بویا حالنہ کثیر .
لمسی ایچون اعمالات خانہ لر موجود در . مع نواحی زبید
قضاسنک نفوس عمومیه سی یوز بیک رادہ سندہ در .

○ بیت الفقیہ ○

زبیددن شمالاً اوچ ساعتہ زرانیق قبیلہ سنک اک
مشہور ومعمور پازاری اولان حسینیه قریہ سنہ و درت
ساعتہ بیت الفقیہ قصبہ سنہ مواصلت اولنور . بو قصبہ
اووودہ و طوغلہ دن و اکثریسی عریش اولہرق
بیک بشیوز قدر خانہ بی واوچ بیک قدر نفوسی اسلا .
میہ بی مشتملدر . سکناسنک اکثریسی حوک دنیلان
بز طوقومہ جیلرندن ومتباقیسی اطرافہ کیدوب کلان
پازار جیلردن عبارتدر . بیت الفقیہ دن شمالاً ایکی ساعتہ
لاویہ ودرت ساعتہ دریہ می قریہ لرینہ و اوچ ساعتہ
حدیدہ یہ کلنور .

○ صنعا دن شمالاً سیر و سفر طریقہ ○

صنعا دن شمالاً بش ساعتہ بر صرت اوستندہ واقع
جربان قریہ سنہ و اورادن بش ساعتہ عمران بلدہ سنہ
مواصلت اولنور . عمران دوز اووودہ سور ایچندہ
طاشدن اوچیوز قدر ابنیہ بی و ایکی بیك قدر نفوسی
جامعدر . عمران دن بش ساعتہ صفا کوینہ چیقیلور .
بو کوی یوکسک طاغ تپہ سنندہ اولوب عمران
اولان مذکور طریقہ قولای چیقیلور ایسہدہ جهت
شمالیہ سی صعب المرور بر یقوشدر . اوچ ساعتہ قطع
ایدیلان بویقوشک نہایتندہ درہ ایچندہ اوچ درت موقعہ
آقار صوی و پک چوق قہوہ لکری حاوی شرس چار -
شوسنہ واریلور . شرسدن ایکی بمچق ساعتہ حجه طاغہ
چیقیلور . اوچ موقعہ متفرق خانہ لری محتوی و نفوس سحہ
عمران دن زیادہ در . بالادہ مذکور اولان وادی شرس
ایلہ بر قاچ جسیم ایرماقلر کچہرک اراضیسنی اسقا ایتدہ
یکندن کاملاً قہوہ لکری ایچندہ اولوب غایت مثبت
و محصولدار و ہلہ قہوہ محصولی ہر قضادن کثرتلیدر .
عمران و حجه قضالرینک نفوس عمومیہ لری اون بشر بیك

را ده سنده در . حجه دن اوچ ساعتده سوق الحصیب نام
کویه اینلور . اورادن غرباً اوچ ساعتده دوز اووده
واقع خولان کوینه و اوچ ساعتده ینه دوز اووده
تهامیه مخصوص عریش خانه لی بنی عبید والقی ساعتده
آرتق تهامیه عریش خانه لی ریغه کوینه و اورادن اوچ
ساعتده فناوص نام قریه یه کلنور . بو قریه قهوه محصو -
لنک اک بیوک موردو بازار یریدر . و حجه و جهت
شمالیه قهوه لری بورادن حدیده یه و اطراف سائر یه
نقل اولنور . حدیده یه کله جک اولانلر بورادن درت
ساعتده ایکی بیک قدر عریش و بر مقدار کار کیر
خانه و درت بیک قدر نفوس اسلامیه بی حاوی و قبائله
برابر اوتوز بیک نفوسی شامل قضا مرکزی اولان
زیدیه قصبه سنه و اورادن درت ساعتده پاشا
قهوه سنه و ایکی ساعتده تربه و ایکی ساعتده مزریعه
قهوه لرینه و بر بچق ساعتده جبانه کوینه و ایکی بچق ساعتده
حدیده یه کلنور فنا و صک جهت شمالیه سنده واقع حجور
طاغ لرینه کیدمک ایچون شمالاً ریفه دن درت وقتا و صدن
القی ساعتده خوشم کوینه والقی ساعتده سوق الامان
و اوچ ساعتده بنی نشر و بش ساعتده بیت مهاب و ایکی
ساعتده شعر الاعلا نام طاغ اوزرنده واقع طاش ابنیه لی

واوچيوز قدر خانه وبيك قدر نفوسلى كويه چيقييلور.
 تخميناً يكرمى بيك نفوسلى حجور قضا سنك جهت شماليه سى
 هنوز متوحش قبائل ايله مسكون اراضى ايدو كندن
 شمالنه كيدلمز. آنجق غرباً ساحلده كائن لحيه قصبه سنه
 كيدلك ايستنييلور ايسه بنى بشر نام محله كلنوب اورادن
 التى ساعتده عيسى واوچ ساعتده زهره كويلرينه واوچ
 ساعتده لحيه موصلت اولنور. محلات مذكوره وادى
 مور صحراسنك اطرافنده واقع اولسندن طولاني بو
 قطعنه كاملاً هوا سى وخيم وستمه وامراض وبالتيخصيص
 ايپلك جبانلرى مشهوردر. بو اراضينك صوينى اچميانلر
 چيپانندن بر درجه محفوظ قالور. لحيه دن شمالاً عسيره
 قدر ممتداد اولان تهامه يعنى دوز اووهنك سير وسفرى
 قرىيت وسهوات سبيله حراً وقوعبولديغندن طريق برى
 متروكدر. لحيه شهرينك وطريق بحرينك تفصيلاتى
 حديدنهك ساحل شماليسى قسمنده كله جكدر.

﴿ لحيه دن برا و جنوباً حديدنه قدر ﴾

لحيه دن درت ساعتده جعليه كوينه واورادن اوچ
 ساعتده منيره قصبه سنه كلنور. منيره قريه سى تهامه نك

سادات ممتازه قسمندہ ذکر ایدیلان قراسندن بری اولوب
اوج بیک قدر عریش و کارگیر خانه و بش بیک قدر
نفوس اسلامیه بی حاویدر . منیره نیک غرباً اوج ساعت
بعدندہ اطرافنی اوفق طاغیرله محاط برقیبا طوزی معدنی
بولنوب زیدیه مملحه سی نامیلہ مسما در و بو معدندن لغم ایله
سنوی سکزیوز بیک قیهدن متجاوز طوزاخراج اولنهرق
شرقاً و برآ داخله دوه لرله کیدر . برچوق عصر لردن برو
سونمش و جواری آثار برکانیه ایله طولمش اوراده و ولقان
منقذی موجوددر قطری بش مترو طولنده اولان بو
منقذ غایت درین اولوب نهایتی تعیین ایدیله مامشدر .

منیره دن یول اوزرندہ واقع اوفق کویله و یاخود
شرقاً بیوجکجه وضحی نامیلہ مسما کویله اوغرایهرق الی
ساعتده حمزه قریه سنه وایکی بچق ساعتده ذکر کدران
ایدن جبانیه وایکی ساعتده حدیده یه واریلور . حدیده دن
شمالاً و بحرأ عسیر اسکله سی اولان قنقده یه قدر حدیده دن
ساحل خطنی تعقیب ایدرک شمالاً رأس الجدیدورأس الکتیب
نام بر و نلردن صکره جبانه و حمزه و عرج و رأس عیسی کولری
ساحلاً بر برنی تعقیب ایدرک قران اطه سی کلور . جبانه ده اوفق
برلمان واردر . قایقلا اوراده بعضاً بارینور . قران اطه سی
ایسه حدیده یه قرق بش میل بعدندہ و جنوبدن شماله

طوغری اون ایکی میل طول وایکیدن درت میل عرضنده
 قوملی قیالردن و بربرندن اوزاق یدی عدد اوفق کویلردن
 متشکلدر. بیک نفوس قدر سکنهسی کاملاً بالقجی و طاب
 لغیجدر. اطهنک شرق جهتده اوفق بر لیمانی و الیوم
 هندستاندن و جنوب جهتندن کله جک بالعموم سفائن
 و حجاجک قرانتنه محلی اتخاذ اولندیغی جهتله صحیهنک
 منتظم اسکله لری و طاشدن متعدد ابنیه و تحفظخانه لری
 و حجاج و واپورلره صو و بوز ویره جک بخاری جسم
 بوز ماکنهسی و پراتیقه و تخیر محملری و قوردونلراره
 سنده تلفوناری موجوددر. محتاج تطهیر اولان واپور
 و سفائن سائره ایچون بحریهنک اوراده ترسانهسی وارددر.

﴿ صلیف قریهسی ﴾

قران اطهسنک بش میل بعد شرقیسنده و براصلی
 ساحلنده جسم قیا و کول طوزی معدنلرینی حاوی ایکی
 کوولی صلیف نام محل سکنز یوز قدر اهالی محلیهسی
 اولوب کاملاً بالقجیلق و طالغیجلق و مملحهده عمله لک ایله
 مشغلدر. لب دریادن برکیلو مترو بعدنده کی قیا طوزی
 معدنی جسم بولمقله اوراده کی اراضیده شم دیلک اوچ
 میلیون طونیا لاتو طوزک موجودیتی بالمساحه کشف

اولنمشدر . شمدي واپورارله سنهده یتمش سکسان بيک
طونیلاته طوز هندستانه سوق اولنمقدهدر . طوز تحمیل
اولنه جق واپورار بورده سنی بالنفس اسکله یه ویره رک طوز
الور . قره جهتندن اولان اوچیوز مترولك قسمی طاشدن و او توز
متروسی تیموردن اولان بو اسکله نك اوزرنده تامعدن او جا .
قلرینه قدر موضوع اولان رایئر اوستنده متحرک تیمور
واغونلر واسطه سیله النان طوزی اوفق بر ليقوموتیف
چکدرک واپورک بورده سنه قدر ایصال ایدر . اوراده دخی
طوز اداره سنک صوما کنه لری موجوددر . دیاج نامنده
و شرقاً بر ساعت مسافه ده کی کول سنه ده بر دفعه موسم
صیفده التي ماه انجماد ایدر و یکر می بيک طونیلاته لاق
طوز ویرر .

﴿ لویه قضاسی ﴾

صلیفدن شمالاً ابن عباس خوبه قریه لری ساحل
بویندهدر . قران اطه سندن لویه قصبه سنه قدر اون بش
میلدر لویه لب دریاده واقع اون بش درجه قرق اوج
دقیقه عرض شمالیده سور ایله محاط ایکیوز قدر کارگیر
وسور خارچنده یمن وشام محله لری نامیله بشیوز قدر
عریش و کارگیرخانه لری وایکی بيک قدر نفوس اسلامیه یی

محتویدر. تهامه شهر لرندن اولدیغی جهته احوالی حدیده فصلنده مندر جدر. جهت جنوبیه سنده سطح بحر دن الی مترو ارتفاعنده کی اوفق برطاغ اتکنده در. اوراده مظنه دن شیخ احمد بن عمر الزیلعی حضر تکرینک مرقد شریفلری وارد در. بالاده اسمی کچن وادی مورک فیضانی زماننده لیهنک شرقنده کی اووه نی کاملاً احاطه ایدرک دکره منصب اولور. بو اثناده لیه شهری بر اطه حالنده قالور. اراضینک منحط بولنمی و غرباً دکرک قریبی سببیه بتون سنه اطراف متعفن بطاقلق حالنده قالور و سیوری سینک اطرافی استیلا ایدر. اهالینک ایچدیکی صو ایشته بوو ادینک مجراسنده یارم ساعت بعدنده نعمان و بر ساعت اوزاقلغنده نصایب قیولر ننددر. غایت اغر و ستمه بی دعوت ایدن بو صولر وقت فیضانده دهها زیاده کسب و خامت ایدرک امراض متنوعه و بالخاصه حمای تیفوئیدی به باش کوسترور. بو یوزدن سکنه سی کتدکجه تناقص ایتمکده در. اهالینک قسم کلیسی قایتجی و بالقجی و طالغیج و قسم جزئیسی امتعه و حبوبات و منقولات ایله اخذ و اعطا ایدر تجار دن عبارتدر. تجارت سنویه سی الی بیک لیرا درجه سنده در. لیهنک بر ساعتک شرقنده واقع زهره نامیله بر قیا طوزی معدنی وارد در. بو معدن لغم

ایله چیقاریلان طوز سنوی دوت یوز بیک قیه درجه-
سنده اولوب شرقاً داخله دوه ارله نقل اولنور.

﴿ چیزان ﴾

لحیه دن شمالاً جبل میدی الوحله الحکامیه نام قریه لر
ساحل بوینده در . لحیه نك الی میل بعد شمالیسنده
اوج دوت عدد اوفق بر سلسله جبالک غربنده طاشدن
بر قاچ خانه وا کتریزی عریش اولق اوزره یوز الی
قدر مسکن وبشیوز قدر نفوسی حاوی چیزان نامیله
اوفق بر شهر اولوب جهت جنوبیه سنده کی طاغک
اوستنده قدیم بیوک بر قلعه سی واردر . ایچدکاری صو
شهرک شرق شمالیسنده کی قیواردن آز طوزلیجه بولانق
بر صودر . اهالیسنک جزئیسی تجار وا کتریزی دکزجی
اولغاه صنعتاری عدت وسائر محلاردن گندی قایقاریله
امتعه واشیا کتیرمک واینجو وصدف وباق صید ایتمکدن
عبارتدر . تجارت سنویه سی اوتوز بیک لیرا قیمتنددر .
جهت شرقیه بریه سنده کی مسارحه قبیله جسیمه سی ایله
ابو عریش قصبه سی وصدء جبالی کبی مسکون ومعمور
اراضی یه اسکله و اورادن حبوبات وقهوه وفواکه
کلدیکندن مواردات پریه وبحریه سی مهم وتجار تکاهددر .

شهر دن شرقاً یکرمی دقیقه بعدندہ بیوک قیاطوزی معدنی
واردردہ بو معدندن لغم ایله سنوی درت یوز بیک قیہ
قدر طوز اخراج ودوہارله داخله نقل اولنور .

عریش ابو عریش

جیزانک برآ وشرقاً التی ساعت مسافده واقع ابو
عریش قصبہ سی قدیم بر مملکت اولوب اوچ بیک قدر
عریش وکارگیر خانہ لری ویش بیکدن متجاوز نفوسی
شامل معمور بر قصبہ در . جیزانک کذلک التی ساعت
شمال شرقیسنده صیبا نامیلہ موجود اولان قصبہ ابو
عریش قضاسنه معادل و معمور و تجارتکاهدردہ . وعسیر
ایله یمنک حد فاصلیدردہ .

فرسان اطہسی

جیزانک غرب جنوبیسنک قرق میل قدر بعدندہ
قوملی بر صیغلق واسطہ سیله یکدیگرینه کسب التصاق
ایدن و فرسان نامیلہ معروف اولان ایکی اطہ واردردہ .
جنوبدن شمالہ طوغری الی میل طول واون ایکی میل
عرضنده طاعلق و طاشلق دن متشکل و بربرندن اوزاق
بشیوز نفوسی شامل کولردن عبارتدر . برآز خرما
آغاجلرینی حاوی ویاغمور وقوعنده بعض محللارنده

دوره زرع ایدلمکده ایسه ده جزئی و اهمیتسنزدر. سکنه سی
جیزان سکنه سی کبی دکز جیلکدن تعیش ایدر. اطه نك
بعض منحط ومدو جزره دها زیاده معروض اولان سوا.
حلنده کول طوزی حاصل اولور. كذلك اطه نك ترسب
ایدن قسمنده دکزك جزر زماننده چامورله قاریشیق
صیزان وغاز و نفت رایحه سنده بولنان بر مایعی کوللر بز
واسطه سیله نشف ایدرک بزى صیقمقله استحصال ایلدکلری
بومایعی غاز یرینه تنویراتده قوللانورلر.

« قنقده »

جیزاندن قنقده یه کیدر ایکن ساحلاً قوز خسه
ایتود شقیق البرك الوسم حلی قریه لری بر برینی تعقیب ایدر.
جیزاندن شمالاً یوز الی میل بعدنده اون طقوز درجه
عرض شمالیده ساحل کنارنده واقع اولان قنقده قصبه سی
بیك قدر عریش و کارگیر خانه لری و بش بیك قدر نفوس
اسلامیه بی حاویدر. قنقده عسیر قطعه سنك اسکله سی اولق
جهتیه مهمدر. یرلیسی لیه کبی تجارت و اخذ و اعطا
ودکز جیلکله تعیش ایدر. تجارت سنویه سی سکسان بیك
لیرا درجه سنده دره ساحل جنوبیسنده حلی و شقیق و جی
عمیق ناملریله جهت شمالیه سنده رحمان و یبسا و دوقه

نامریله مملحه لر موجود اولوب بورادن سنوی الی یوز
بیک قیه قدر کول طوزی دوه لرله برآ داخله نقل
اولنور .

« قنقده دن ابه ایله قدر »

قنقده دن عسیرک مرکزی اولان ابه ایله برآ دوه ایله
کیددیکی جهتله قنقده دن دوه ایله سکز ساعته کوز
کوینه و کوزدن اون ایکی ساعته سوق الجمعة نام چارشو
یرینه و اون درت ساعته وادی یه مواصلت ایدیلور .
مذکور وادی یارم مترو قطرنده آقار صوی حاوی بردره
اولوب اورادن بوغاز تشکیل ایدن طاغردن بالمرور طقوز
ساعته بارک کوینه و بارک کویندن اون ساعته مصباح
کوینه و اورادن الی ساعته محائل قصبه سنه و اریلور .
محائل قضاسی یدی یوز قدر عریش و کارگیر ابنیه یی
واوچ بیک قدر نفوس اسلامیه یی حاویدر . محائلک اطراء
قنده هر سنه و باعلتی ظهور ایدر و فقط توسیع دائره
سرایت اتمیوب مرض محلی حکمنده ایکی ماه قدر او
جوارده قالدقدن صکره دفع اولور . محائلدن ایکی طرفی
اوفق طاغلق و طاشلقردن عبارت اولمق اوزره دره دن
بالمرور درت ساعته عیده کوینه و اون درت ساعته عقبه یه
و اورادن سکز ساعته ابه ایله مواصلت اولنور .

« ابها »

ابها قصبه سی هواسی صنعا کبی صغوق و صاغلام
و صنعا ده بولنان فوا که وسبزه لرك همان جمله سی موجود دره
درت محله منقسم اوله رقی مرتفع اووده بش اتی یوز
خانہ بی واوچ بیکدن متجاوز سکنہ بی حاویدرہ عسیر
قطعه سی تہامہ فصلندہ مذکور اولان فصول و طبایع
و احوالہ تابعدرہ . انجق اورادہ قات غیر موجود ایدوہ
کسندن اہالیسی یمن تہامہ اہالیسندن دہاقوی وامراضدن
سالم دہا ذکی و فطیندرہ . جملہ سی بغدادی رنگندہ
واکثریسی کوسہ درہ . عسیر جبالندہ قہوہ و بال و حبوبات
وفوا کہ و بادم حصولہ کلورہ . یمن ایلہ حجاز ولایتلری
آرسندہ واک زیادہ حجاز قریبندہ بولنسی جہتیلہ عربانی
کاملآ حجاز عربانہ مماثل و مشاہددرہ . قطعات سائرہ دن
اورایہ کسہ کیتمدیکندن ایشاک و معمور دکلدرہ . عربانی
سرد و سوزندہ سابتدرہ . طبایع وامزجہ سی خشونتله
برابر پک زیادہ خدید و متوحشدرہ . اکثریسی مواشی
وحیوانات یوزندن تعیش ایدرلر و قریبتی اولان حجاز
ولایتہ کتوروب ساتارلر . ملیت و بدایت و وحشت
قدیمہ لرینہ محافظدرہ . حتی جہانک ہیچ برقطعه سندہ جاری

اولیان ختان اصولی الآن اوراده صورت فجیعهده مع-
الافتخار جاری و باقیدر . شویله که عسیرلیلر ذکوری
کوچک یاشیده ایکن ختان اتمیوب حد رشد و بلوغه
وصولنده و علی الاکثر ازدواج زماننده یعنی عقد نکاح
صره سنده اجرا ایدیور . کنجک سنت ایدیله جکی کون
نشانلیسی حاضر بولنور و طاووللر چائهرق علی ملاء-
الناس کوبکنک آلتندن اشاغیلره قدر دری بتون بتونه
یوزیلور . بو عملیات اثناسنده کندیسسی اصلا فتور کتیر-
میهرک النده حنجر ایله اوینسایهرق صبر و تحمل ایدر .
جان خراش بر صورتده یاپیلان بو عملیات اثناسنده مثلا
کوز یومار یاخود اثر تالم کوسترر ایسه جسارتسزلکنه
حمل ایله تعیب ایدرلر و نشانلیسی کندیسندن واز کچر .
ختام ختانده خانه سینه کتوررلر یوزلمش اولان محله
قرمزی بوهر قدر یاقیجی سلع تعبیر ایتدکلری برنباتی
سوررلر یاره یری آتش ایله یانمش کبی التیام بولنجیه قدر
هفته لرجه آرقه اوستی قالور . بو صرهدده عمری اوزون
اولانلر قورتیلور ایسهده وفات ایدنلر چوقدر . بو
صورتله سنت اولما مشلره قیز و یرمنلر و مرغل نامیله یاد
ایدرلر . عسیرلیلر مآثر و مقابری زیارت ایتمز و مظنه

و ساداته رعایت اینز و عقائد دینیہ سائرہ یہ سلوک ایتمز
وہابی مذهبندہ در .

حدودی طائف و مکہ مکرمہ یہ قدر منتهی اولان
غامد و رجال المع و بنی شہر ناملریلہ بر بردن اوزاق اوچ
قضا و برچوق نواحی و قراسی دها وارد در . بوقطعه عربان
کتیرہ ایلہ مسکوندر و سلاحشور اقلہ مشهور در . اورادہ
درت یوز بیکدن متجاوز نفوس تخمین اولنمقدہ در .
عسیردہ عموجہ قزینی قرنداش عد ایدرک عمزادہ .
سنہ و یرمز لر طائفہ نسا یوز یاشنندہ اولسہ بیلہ اثنای
ندادہ کندیسنہ یا بنت تعبیریلہ چاغیرملق عادتر . بنت
دنیا مزسہ جواب و یرماز .

« یام »

عسیرک جهت شرقیہ سیندن جنوبہ طوغری ایکی
بیوک آقار درہ لری حاوی بولنان وادی نجران جبل برط
نام طاغہ قدر اوچ کون امتداد ایدن اراضیسندہ دوی
محمدودوی حسین نام قبیلہ لرہ انقسام ایدن یام قبائلی آلتمش
بیک نفوس مقدارندہ اولوب بونلر کاملاً اسماعیلی
مذهبندہ در . مرکز لری نجران . نام معمور قصبہ اولق
اوزرہ برچوق قرایہ متفرق در . بوقبائل زراعت و مواشی

زندن کچینیرلر. خارج ایله اختلاط و مناسبتلری یوقدر.
سبب المذهب بشقهجه تابع بولندقلری اماملرینه مکرمی
رلر.

« حاشد »

جبل برطدن جنوبه طوغری بلاد عمرانه قدر
ساکن اولان حاشد و همدان و ارحب و انهم نامنده
یدی مذهبنده بولنان شهره صعده خمر قفله نام جبال
صبه لرله قراسنده الی بیک نفوس درجه سننده قبائل
ساکن اولوب بری صعده و دیگر شهره ده منصوب
ن زیدی اماملره تابعدرلر. برطدن جنوباً تعزک شرقه
حضر موت قطع سنه منتهی اولان اراضی سننده یافع
لی ساکندر. بورالری کندی رؤسا و مشایخ لرینک
سننده در. یکر می بیک نفوس راده سننده اولان یافع
لی دخی خارج ایله مناسبتلری اولدیغندن احوال
موصیه و موقعیه لرینک بوندن زیاده ایضاحی میسر
امامشدر.

انہا

فی ۵ ربیع الاخر سنه ۳۲۸ و فی ۲ نیسان سنه ۳۲۶



فهرست

	صفحه
عدن	۵
پریم اطهسی	۱۰
شیخ سعید	۱۱
مخا	۱۱
جبل زوقر اطهسی و حدیدهیه قدر سواحل	۱۶
حدیده	۲۱
صنوف ممتازه	۳۳
تراهه قطعه سنک احوالی	۳۵
حدیده دن صنعا طریقی	۴۲
باجل و جواری	۴۲
حراز	۴۴
جبال منطقه سنک احوالی	۴۶
حراز دن صنعا یه قدر	۵۲
صنعا	۵۳
ضمار پریم ایپ قضاوری	۵۵
تعز	۵۶
تعز دن حدیدهیه قدر	۵۷

حيس

زبيد

بيت الفقيه

صنعادن شمالاً عمران حجه سوق الحصيد قناوص

زيديه

بنی نشر حجور حليه

لحيه دن حديدیه برآ

قران اطهسى

صليف

لحیه

جيزان

ابوعريش

فرسان اطهسى

قنفده


ابها

عسير قطعه سنك احوالى

يام قبائلى

حاشد ويافع قبائلى





MAIN STACKS

mai
DS247
Y48
Z83
1910